

釋迦方誌序

壁三

唐終南太一山釋道宣撰

惟夫大唐之有天下也將四十載淳風洽而
澆俗改文德修而武功暢故使青丘丹穴之
候並入提封龍砂鳥塞之區聿遵聲教膜拜
稽首顯朝宗之羽儀輸賫奉贄表懷柔之盛
德然則八荒內外前史具書五竺方維由來
罕述豈非時也雖復周穆西狩止屆崑丘舜
禹南巡不踰滄海秦皇畫野近表臨洮漢武
封疆關開鐵路厥斯以降遐討未詳所以控

峒問道局在酒泉之地崑崙謁聖實崔王門
之側至於弱水洞庭三危九隴燕然龍勒沙
障黎河具曆夏書咸圖雍部及博望之尋河
也創聞大夏之名軒皇之遊夢也初述華胥
之國貳師之伐大宛定遠之開鐵門由余入
秦日殫仕漢聲榮覆於葱嶺帝德亘於耆山
赫奕皇華其徒繁矣而方土所記人物所宜
風俗之沿革山川之卓詭雖陳之油素畧無
可紀豈不以經途遼遠遊詣之者希乎以事
討論縱有傳說皆祖行人信非躬覩相從奔

鏡虛為實錄何以知其然耶故積石河源西
 瞻赤縣崑崙天柱東顧神州鳴砂以外咸稱
 胡國安用遠籌空傳緗簡是知身毒之說重
 譯臻焉神異等傳斷可知矣自佛教東傳祭
 光燭漢政流十代年將六百輜軒繼接備盡
 觀方百有餘國咸歸風化莫不梯山貢職望
 日來王而前後傳錄差互不同事迹罕迷稱
 謂多惑覆尋斯致宗歸譯人昔隋代東都上
 林園翻經館沙門彥琮著西域傳一部十篇
 廣布風俗畧於佛事得在洽聞失於信本余

以為八相顯道三乘陶化四儀所設莫不逗
 機二嚴攸被皆宗慧解今聖迹靈相雜沓於
 華胥神光瑞影氤氳於宇內義須昌明形量
 動發心靈洎貞觀譯經嘗參位席傍出西記
 具如別詳但以紙墨易繁閱鏡難盡佛之遺
 緒釋門共歸故撮綱畧為二卷貽諸後學
 序之云爾

釋迦方志一部八篇

封疆篇第一

統攝篇第二

中邊篇第三

遺跡篇第四

分上下

遊履篇第五

通局篇第六

時住篇第七

教相篇第八

仰尋諸佛之降靈也不可以形相求之隨機顯晦故得以言章述矣然學教者統舉為先傍窮枝葉終非遠致故於篇首標其致焉
釋迦方誌卷上

唐終南太一山釋道宣撰

封疆

統攝

中邊

遺跡

封疆篇第一

佛之所王土也號曰常訶世界即古翻經為

娑婆矣經中所謂忍土者也謂此土人強識力念能忍苦樂堪任道器故佛王之案此封疆周輪鐵山山外是空空不可測山下是地地下是金金下是水水下是風其風堅實逾於金剛眾生心力同業所感能持世界不令傾墜自風以外即是虛空約此周輪從下而上至無色窮名為有頂論其盡界縱廣所經卒非里數之所度也且如智度論從色界天下一大石經一萬八千三百八十二年方始至地約此上下方維名為一佛所王土也

以即

大千鐵圍而為封疆之域

統攝篇第二

按索訶世界鐵輪山內所攝國土則萬億也何以知之如今所住即是一國國別一蘇迷盧山即經所謂須彌山也在大海中據金輪表半出海上八萬由旬日月迴薄於其腰也外有金山七重圍之中各海水具八功德其外鹹海廣於無際海外有山是鐵所成四周繞之海中可居者大畧有四即約蘇迷山用分方面東洲名毘提訶南洲名瞻部西洲名

瞿陀尼北洲名拘盧也此之四洲亦名四有人之所居佛之所王准此傍及鐵圍海內唯有四洲蘇迷山已上二十八天并一日月為一國土即此為量數至一千鐵圍都繞名小千世界即此小千數至一千鐵圍都繞名中千世界即此中千數至一千鐵圍都繞名為大千世界按此三千大千世界其中四洲山王日月乃至有頂則有萬億之所皆為佛之統攝俱遵聲教

中邊篇第三

惟夫法王所部則大千之內攝焉若據成都則此洲常爲所住故此一洲則在蘇迷山南之海中也水陸所經東西二十四萬里南北二十八萬里又依論說三邊等量二千由旬南邊三由旬半是則北闊而南狹人面象之又依凡記人物所居則東西一十一萬六千里南北遠近畧亦同之所都定所則以佛所生國迦毘羅城應是其中謂居四重鐵圍之內故經云三千日月萬二千天地之中央也佛之威神不生邊地地爲傾斜故中天竺國

如來成道樹下有金剛座用承佛焉據此爲論約餘天下以定其中若當此洲義約五事以明中也所謂名里時水人爲五矣所言名者咸謂西域以爲中國又亦名爲中天竺國此土名賢談邦之次復指西宇而爲中國若非中者凡聖兩說不應名中昔宋朝東海何承天者博物著名羣英之最問沙門惠嚴曰佛國用何曆術而號中乎嚴云天竺之國夏至之日方宇無影所謂天地之中平也此國中原影圭測之故有餘分致曆有三代大小

二餘增損積筭時輒差候明非中也承天無以抗言又帝聞之乃勅任豫受焉夫以八難所標邊地非攝出凡入聖必先中國故大夏親奉音形東華晚開教迹理數然矣二言里者夫此一洲大分三量二分以北土曠人稀註三獯狁所居無任道務一分以南盡于三海人多精爽堪受聖化故約道勝大聖都焉故成光子云中天竺國東至震旦國五萬八千里震旦即神州之號也彼人目之南至金地國五萬八千里西至阿拘遮國五萬八千里北至小香山阿耨

達池五萬八千里觀此通攝取其遐邇齊致以定厥中其理易顯三言時者謂雪山以南名為中國坦然平正冬夏和調卉木常榮流霜不降自餘邊鄙安足語哉四言水者此洲中心有一大池名阿那陀答多此言無熱惱也即經所謂阿耨達池在香山南大雪山北居山頂上非凡所至池周八百里四岸寶飾正南當於平地地獄所居故金剛座東僻五千里又池正南當洲尖處其北當謎羅川即北又當葱嶺北千泉也上空定約當北辰星

今望第五似如西歌且天上一寸地下一千
千泉去京八千餘里焉約天無一尺矣其池
北去鉢露羅國減千里東南屈露多國西南
屬賓國各千餘里然四海為壑水趣所極故
此一池分出四河各隨地勢而注一海故葱
嶺以東水注東海達嚙以南水注南海雪山
以西水注西海大秦以北水注北海故地高
水本注下是其中此居海濱邊名難奪又佛
經宏大通舉事周博見聖賢義非妄委於上
所列咸符地圖然此神州所著書史寓言臆

度浮濫極多時約佛經更廣其類都皆蕪穢
試為舉之水經云無熱丘者即崑崙山又扶
南傳云阿耨達山即崑崙山又山海經云南
流沙濱赤水後黑水前有大山名崑崙丘又
云鍾山西六百里有崑崙山出五水按穆天
子傳云春山鍾音三又云海內崑崙丘在西北帝
之下方八百高萬仞又十洲記云崑崙陵即
崑山也在北海亥地去岸十三萬里此約指
佛經蘇迷山也又東海中山名方丈亦名崑
崙又云西王母告周穆云山去咸陽三十六

萬里高平地三萬六千里又周穆傳述西王母云去宗周瀘澗一萬一千一百里神異經崑崙山有銅柱其高入天圍三千里榮氏注云柱洲崑崙山東南萬二千里有無外山中記云崑崙山去嵩高五萬里高萬一千里郭璞云高二千五百餘里淮南云高萬一千一百里十四步二尺六寸道經造立天地記云崑崙山高四千八百里又轉形濟苦經云其萬九千里又云此山飛浮又云崑崙山南三十里次第有千崑崙山名小千世界又道經云

崑崙山高九重相去各九千里又云高萬萬五千里已前儒道兩說雖形量差異莫越崑崙尋崑崙近山則西涼酒泉之地穆后見西王母之所具彼圖經若崑崙遠山則香山雪山之中也河源出焉故爾雅云河出崑崙墟郭璞圖讚云崑崙三層號曰天柱實惟河源水之靈府按禹貢云導河自積石者但據伏流所出處而名之若討本源誠有由矣故佛經云此無熱池東有銀牛口出疏伽河即古所謂恒河也右繞池而流入東南海南有金

象口出信度河即古辛頭河也右繞池而流入西南海西有瑠璃馬口出縛芻河即古博又河也如上繞池入西北海北有頗胝師子口出徙多河即古私陀河也如上繞池入東北海按河圖云崑崙山東方五千里名曰神州亦名赤縣又依書云河源東北流出葱嶺岐沙谷分爲兩水東北支流經于闐南山於國西北出又東流大河經竭盤陀城東南又經踈勒國西又東北至城下又迴流國南五百餘里至烏鎡國南又東北至踈勒國北六

百一十里至烏孫界赤谷城又東二百七十里經姑墨國南又東六百七十里經龜茲國南又東三百五十里經烏疊國南此即漢時都護所治也西南去踈勒二千一百一十里東南去鄯善國千七百八十五里東北去烏耆國四百里河又東南三百四十里經渠梨國南又東二百四十里經黑山國南此東去玉門關二千六百六十里河又東經連城注賓城南沮沫國北合支水河又東經婁蘭地又東經鄯善國城南過東北數百里入蒲昌

海其海東面少北去玉門一千三百里又東北去陽關三百里此河於蒲昌伏流南而少西數千里入積石山在羌燒党中書云積石去崑崙五千七百四十里或云伏流萬三千里斯諸臆說難以究詳河出積石西南流九屈東北合流經析支地是為河西又東北入塞過燉煌張掖南是為河源矣按此實錄以尋河源窮至無熱惱池所方為討極然此池神居非人所及又是北天雪山之域南接中土佛生之地以處高勝故非邊矣五謂人者

不出凡聖凡人極位名曰輪王聖人極位名曰法王蓋此二王不生則已生必居中又山川國邑人之依報人勝則依勝故此二王居焉又輪王有四王約統四洲金輪王者則通四有銀輪三方除北一洲銅輪二方除西北方鐵輪在南除於三方言瞻部者中梵天音此言譯為輪王居處言四輪王通局乃殊佳必南方也古翻此洲云好金地謂閻浮檀金在洲北岸海中金光浮出海上其傍有閻浮樹林其果極大得神通者方至於彼今言元

洲輪王得名兩設其致耳又此一洲四主所
統雪山已南至于南海名象主也地唯暑濕
偏宜象住故王以象兵而安其國俗風躁烈
篤學異術是為印度國然印度之名或云賢
豆或云天竺或云身毒天篤等皆傳之訛僻
耳然以印度為正唐無以翻雪山之西至于
西海名寶主也地接西海偏饒異珍而輕禮
重貨是為胡國雪山以北至于北海地寒宜
馬名馬主也其俗兇暴忍殺衣毛是突厥國
雪山以東至于東海名人主也地唯和暢俗

望三

九

行仁義安土重遷是至那國即古所謂震旦
國也上列四主且據一洲分界而王以洲定
中輪王為正居中王邊古今不改此土諸儒
滯於孔教以此為中餘為邊攝別指雒陽以
為中國乃約軒轅五岳以言未是通方之巨
觀也又指西蕃例為胡國然佛生遊履雪山
以南名婆羅門國與胡隔絕書語不同故五
天竺諸婆羅門書為天書語為天語謂劫初
成梵天來下因味地脂便有人焉從本語書
天法不斷故彼風俗事天者多以生有所因

故也胡本西戎無聞道術書語國別傳譯方
通神州書語所出無本且論書契可以事求
伏羲八卦文王重爻蒼頡鳥迹其文不行漢
時許慎方出說文字止九千以類而序今漸
被世文言三萬此則隨人隨代會意出生不
比五天書語一定上以五義以定中邊可以
鏡諸餘如隋初魏郡沙門靈裕聖迹記述
遺跡篇第四之上

自漢至唐往印度者其道衆多未可言盡如
後所紀且依大唐往年使者則有三道依道

所經且覩遺跡即而序之其東道者從河州
西北度大河上漫天嶺減四百里至鄯州又
西減百里至鄯城鎮古州地也又西南減百
里至故承風戍是隨互市地也又西減二百
里至清海海中有小山海周七百餘里海西
南至吐谷渾衙帳又西南至國界名白蘭羌
北界至積魚城西北至多彌國又西南至蘇
毘國又西南至敵國又南少東至吐蕃國又
西南至小羊同國又西南度咄倉法關吐蕃南
界也又東少南度末上加三鼻關東南入谷

經十二飛梯十九棧道又東南或西南緣葛

攀藤野行四十餘日至北印度尼波羅國

此國

去吐蕃約為九千里其中道者從鄯州東川行百餘里

又北出六百餘里至涼州東去京師二千里

從涼州西而少北四百七十里至甘州又西

四百里至肅州又西少北七十五里至故玉

門關關在南北山間又西減四百里至瓜州

西南入磧三百餘里至沙州又西南入磧七

百餘里至納縛波故國即婁蘭地亦名鄯善

又西南千餘里至折摩陀那故國即沮洳地

又西六百餘里至都羅故國皆荒城耳又西

入大流沙行四百餘里至瞿薩旦那國東境

即漢史所謂于闐國也都護所居漢之所守東去長安九千六百七十里其關名

尼壤城彼土自謂于遁國也周四千餘里沙

磧太半寺有百餘僧出五千大乘學者從關

十一

至媿摩川二百餘里有媿摩城中有梅檀立

像高二丈餘極多靈異光明疾者隨痛以金

薄帖像上便愈其像本在憍賞彌國是鄔陀

衍那王所造陵空至此國北曷勞落迦城有

異羅漢每往禮之王初不信以沙土空羅漢

乃告敬信者曰却後七日沙土滿城於後二日乃雨寶滿街至七日夜果雨土填城畧無遺人其先告者預作地穴從孔而出東趣媿摩像亦同至有記云法滅之時像入龍宮也其曷勞城今為大阜王欲掘寶必遭風變又於媿摩城西行三百三十里方至國城王都南十里有大寺先王所立西南十餘里寺有絛紵立像從屈支國來昔此有臣於彼禮敬臣還本國遙念無已像遂夜至乃捨宅為寺都城西三百餘里勃伽夷城有坐像高七尺

相好無比首有寶冠光明時現都城西百六十里路中大磧唯有鼠壤形大如蝟毛金銀色昔匈奴來寇王祈鼠靈乃夜齧人時兵器斷壞自然走退都城西五里許寺有浮圖高百餘尺多現光相王感舍利數百粒羅漢以右手舉浮圖安之函內乃下之無傾動也都城西南十餘里有瞿室餒伽山此云牛角有寺像現光明佛曾遊此為天人說法記其建國崇學大乘山巖石室有一羅漢入滅心定待慈氏佛數百年前崖崩塞戶其國南界接東女

國從國城西越山谷行八百餘里至斫句迦
國即沮梁也南境其國周千餘里佛寺十餘僧徒
出百學大乘者國南有山立多羅塔松泉流
茂石室深淨有三羅漢現入滅定鬚髮恒長
僧常剃之五印度僧有證果者多止此室又
北減三百里方至都城周十餘里山阜連屬
臨帶兩河又於國西北上大沙嶺度徙多河
五百餘里至佉沙國即疎勒地周五千餘里寺數
百僧數萬習小乘有部地多石磧其俗生子
壓頭匾處從此南行山野石磧五百餘里至

烏鐵國周千餘里都城周十餘里南臨徙多
河信佛法寺十餘所僧減千人習小乘學城
西二百餘里至大山嶺上有塔數百年前山
崖自崩中有比丘冥目而坐形甚偉大頭髮
下垂覆于肩面國王以魚油灌之擊捷槌比
丘高視曰我師迦葉波也今始乃聞已涅槃
耶又問釋迦佛出世耶告云已滅度矣即昇
空化火焚身其土出白瑩青玉等從國城西
度河登葱嶺東崗八百餘里至福舍其地在
四山之中方百餘頃無樹木有細草緣如別

說又西南踰大嶺至揭盤陀國周二千餘里
 都城周五十餘里北皆徙多河敬佛法寺十
 餘僧五百餘人小乘有部其國東南大石室
 二口各一羅漢入滅心定經七百餘歲其鬚
 髮生年別為剃又西北行三百餘里方至王
 都東南臨徙多河山嶺連屬又西少南登山
 冰雪五百餘里至波誑羅川東西千餘里南
 北百餘里或無十里據南北大雪山間地鹹
 鹵多石草木希少絕無人住川南越山有鉢
 露羅國此川在大葱嶺上瞻部一洲地最高

壁三

十三

也中有大龍池東西三百餘里南北五十餘
 里大卵出焉其水西流至達摩悉帝國東界
 與縛芻河合故此已西水並西流東出一流
 東北至佉沙國西界與徙多河合自此諸水
 皆東流也龍池正南當無熱池北當千泉川
 南當池大嶺名婆羅摩羅南北三四百里山
 地極高池北即大蔥嶺也水經云高可千餘
 里兩邊漸下南北豎嶺行數極多百餘條矣
 多有山蔥崖峽葱翠因以名馬嶺南接大雪
 山北至千泉應有二千五百許里東極烏鍛

西達活國應三千餘里又從川西南入山險七百餘里至商彌國周二千六百里土出雌黃國人信佛寺有二所僧亦少耳北越達摩悉帝大石山至尸棄尼國周二千餘里山磧連野又南越山河至達摩鐵悉帝國一名護侃國一名護密國即覩貨羅之故地也在兩山間東西千五百里南北減百里或狹不踰十里東臨縛芻河寺有十餘僧數蓋少城寺石像上懸金銅圓蓋衆寶飾之人有旋繞蓋亦隨轉人止便止四周石壁莫測其然有說聖力使之或

謂機關之秘又西南登山入谷五百餘里至屈浪拏國亦故地也周二千餘里少有信向又西北踰嶺三百餘里至淫薄健國亦故地也周千餘里都城十餘里又西北山谷行二百餘里至鉢鐸劍那國亦故地也周二千餘里都城山崖上壁三周六十里寺有四所僧亦少耳山谷西行二百餘里至呬摩咀羅國亦故地也周三千餘里山川相半堅城數十西越山谷三百餘里至訖栗瑟摩國亦故地也東西千餘里南北三百里都城周十五里北至

鉢利曷國亦是故地廣百餘里南北三百餘里都城二十餘里又從訖栗國越峻入洞經川城三百餘里至普健國亦是故地周四百餘里都城周十六里北渡河至阿利尼國亦故地也周三百餘里帶縛芻河兩岸大城周十五里東渡河至遏羅胡國亦故地也北臨前河周二百餘里大城周十五里又從普健國西行百餘里出葱嶺西頭尋山而下至活國亦是故地周二千餘里王城周二十餘里其王突厥也鐵門已南諸小國多屬突厥地

安平俗多信佛寺十餘僧數百大小兼學西至縛曷國四五百里東南越山谷諸城三百餘里至闊悉多國亦是故地國周減千里都城十餘里山多川峽極甚風寒僧寺三所衆亦少耳東南入谷越嶺度諸小城四百餘里至安坦羅縛國亦是故地周三千餘里王城周十五里屬突厥寺有三所僧有數十有育王一塔山阜連屬極寒厲也從此西南上大雪山婆羅犀羅嶺東頭經三日行又至極頂通望瞻部一洲諸山並皆四下又尋嶺下行

壁三

十五

亦三日極峻曲谷鑿氷而度西經迦畢式國
邊城小邑數十又西南數百里方至王都又
西少南一千三百里越山川至弗栗恃薩償
那國廣二千餘里南北千餘里王城周二十
餘里信佛法從此南行五百餘里至漕矩吒
國亦曰周利周七千餘里王城周三十餘里山川
相半寺有百數僧徒數萬皆學大乘育王塔
下所天祠數十計多外道也土宜鬱金香草
出興瞿草生羅摩印度川南境搃那四羅山
王城東南二千餘里至西印度伐刺拏國方

合北道南趣佛國

其北道入印度者從京師西北行三千三百
餘里至瓜州又西北三百餘里至莫賀延磧
口又西北八百餘里出磧至柔遠縣又西南
百六十里至伊州又西七百餘里至蒲昌縣
又西百餘里至西州即高昌故地漢時宜禾
都尉所治處也後沮渠涼王避地於彼今為
塞內又西七百餘里至阿耆尼國即烏東西
六百餘里南北四百餘里都城周六七里僧
寺十餘二千餘人並學小乘說一切有戒行

精勤食三淨肉從此黑嶺胡類羣分重財輕
 義無禮無敬婦尊夫卑良賤一等吉素凶皂
 以為服制又西南行二百餘里踰一小山越
 二大河川行七百餘里至屈支國即丘東西
 千餘里南北六百里城周十七八里寺有百
 餘僧五十餘壁三並學小乘說一切有如上三淨
 俗大信佛王城民宅多樹像塔不可勝記東
 境大城中有天祠池龍時出與牝馬合而生
 龍駒初生龍候子方馴駕故國多善馬近王
 名金華者感龍馭乘王欲終時鞭觸其耳因

即潛隱與人婦通生子驍勇王搆突厥殺此
 城人故令空荒城北四十餘里東昭怛釐寺
 佛堂中有玉石方二尺上有佛足迹長尺八
 寸廣六寸齋日放光王城西門外路左右有
 立佛各高九十餘尺於此建場五年一會西
 有阿奢理貳寺此言奇特也昔王外遊觀禮
 聖迹母弟留守因自割勢為防讒搆王深異
 之弟後遇人捷五百牛遂愍贖之慈善根力
 男形欵生遂不入宮王訝奇特故因置寺又
 西經小磧六百餘里至跋祿迦國古名姑墨
又名亟墨

東西六百餘里南北三百餘里王城周五十
里寺數十所僧千餘人並小乘學西北行三
百餘里度石磧至凌山即葱嶺北原也水多
東流此路不得赭衣持瓠及聲叫有犯者龍
能飛風雨沙遇必皆沒山行自西四百餘里
至大清池又名熱海
亦名鹹海周千餘里東西長四面
有山行人祈福又西北五百餘里至素葉水
城周六七里商胡雜居已西數十孤城亦爾
又西四百餘里至千泉泉涌多出方二百餘
里南面雪山三垂平陸又西百五十里至旦

壁三

十七

邏私城又西南二百餘里至恭御城又南五
十里至笈赤建國周千餘里又西二百餘里
至赭時國此言石國周千餘里西臨素葉河又東
南千餘里至怛捍國周四千餘里山周四境
又西行千餘里至窳覩利瑟那國周千四百
里東臨葉河葉河出葱嶺北西北流又西北
入大磧應五百餘里至
颯末建國此言康國周千六百餘里南北狹都城
周二十餘里處極險固自此東南至弭末賀
國米國也周繞四五百里東西狹又西北至劫

布坦那國也曹國周千四五百里東西長又西

三百餘里至屈霜你迦國何國也周同曹國而

東西狹又西二百餘里至喝捍國東安國也周千

餘里又西四百餘里至捕捍國中安國也周千七

百餘里東西長又西四百餘里至伐地國西安

也周四百餘里又西南行五百餘里至貨利

習彌佉國順縛芻河兩岸東西可三十里南

北五百餘里又從颯秣建國西南行三百餘

里至羯霜那國史國也周可千五百里又西南

二百餘里入大山山路絕險又少人物東南

山行三百餘里至鐵門關左右石壁其色如

鐵鐵固門扉懸鈴尚在即漢塞之西門也出

鐵門關便至覩貨邏國古云吐火羅也之故地南北

千餘東西三千餘東拒葱嶺西接波斯南大

雪山北據鐵門縛芻大河中境西流其中自

分二十七國僧以十二月十六日安居由溫

熱多雨故也順河北下至坦密國東西六百

餘南北四百餘玉城周二十餘里寺十數所

僧出千人大有窳覩波即古塔之別名如偷婆等佛像靈

異又東至赤鄂衍那國東西四百里南北五

百餘王城周十餘里寺五所僧少又東至葱
露摩國東西百餘南北三百餘王城周十六
七里寺有二所僧百餘耳東至愉漫國廣四
百餘里縱百餘里王城周十餘里寺二所僧
亦不多西南臨縛芻河便至鞠和衍那國廣
二百餘里縱三百餘里王城十餘里寺三所
僧百餘又東至鑊沙國廣三百餘里縱五百
餘里王城周十六七里又東至珂咄羅國廣
縱千餘里王城周二十餘里東接葱嶺至拘
謎陀國廣二千餘里縱二百餘里據大蔥嶺

之中王城周二十餘里西南臨縛芻河國南
接尸棄尼國南度此河至達摩悉帝等國如
前中道所引也又從鐵門南而少東五百餘
里至縛喝國一道拘謎西南至縛伽浪國廣
五十餘里長二百餘里都城十餘里又南至
紇露悉泯健國周千餘里都城周十五里許
又西北至拂林國周八百餘里都城周十五
里餘寺十餘僧五百又西至縛喝國廣八百
餘里縱四百餘里北臨縛芻河王城周二十
餘里俗美其國詔為小王舍城寺有百餘僧

望三

十九

三千餘人並小乘學城外西南有納縛

此云新也

寺在雪山北作論諸師讚重此寺基業不替像鑿名珍毘沙門像衛之突厥葉護欲襲寺取寶屯軍寺側夜夢天王長戟貫臂可汗心痛因爾便死堂中有佛澡罐受可斗餘雜色煜燿金石難名又有佛牙長寸餘廣八九分色黃白而光淨佛掃帚者用迦奢草長二尺餘圍可七寸雜寶飾柄三物齋日法俗所感放大光明有大浮圖高二百餘尺金剛泥塗以寶莊之有佛舍利時放神光又諸羅漢入

涅槃者示通立塔雖有證果不現通者則不封樹王城西北五十餘里有提謂城王城正北四十餘里有波利城各有浮圖高三丈許即釋迦開元獻妙長者髮爪之所建也又有佛僧伽胝鬱多羅僧僧却崎又覆鉢豎錫杖次第安布立塔儀式王令依崇建城西七十里迦葉波佛時所建浮圖高二丈餘又從大城西南入雪山河三十餘里至銳末陀國廣五六里縱百餘里王城周十餘里又西南行三百里至胡寔健國廣五百餘里縱千餘里

王城周二十餘里多山川又西北至坦刺健國廣同前縱五十餘里王城十餘里西接波刺斯國界又縛喝國東至拂林國於此東南至紇露悉泯健國千餘里於此北近縛伽浪國東西五十餘里此國東北接活國又從縛喝國南百餘里至揭職國廣五百餘里縱三百餘都城周五里許寺十餘僧三百餘人並小乘學陵阜相連東南入大雪山六百餘里出覩貨羅故地又至梵衍那國廣二千餘里縱三百餘里在雪山中城依巖險寺有數十

壁三

二十

僧數千人學小乘出世部王城東北山河有大石佛高一百五十尺金寶莊飾又東寺左有鑰石釋迦立像高百餘尺分身別鑄合成立之城東三里寺有涅槃卧塑佛長千餘尺亦金寶莊之東南二百餘里度大雪山東寺有佛齒及劫初獨覺齒長五寸餘廣減四寸又有金輪王齒長三寸廣二寸又有商諾迦縛婆即商那和僧傳法第三師大阿羅漢鐵鉢受九升許并九條僧伽胝絳赤色設諾草皮之所績成以其先世於解夏日持此草施僧福力所被

五百中陰身生恒服之從胎俱出逐身而長
阿難度時變為法服受具已後又變為九條
其齒鉢等並金緘之羅漢證滅入邊際定智
願力故留袈裟待遺法盡方乃變壞今已少
損信有徵矣大雪山東至小川澤東入雪山
踰黑嶺至迦畢試國周四千餘里北背雪山
三垂黑嶺都城周十餘里寺有白餘僧六千
餘人多學大乘其王信佛歲造文八銀像自
修供之天祠數十異道千餘人王城東三里
北山下有大寺佛院東門南大神王像右足

下有大寶藏近有外王逐僧欲掘神冠中鸚
鵡鳥像奮羽嗚呼地動王軍皆仆起謝而歸
寺北嶺上有數石室亦多藏寶欲私開者藥
又變為師子蛇蟲來震怒之室西三里大嶺
上有觀自在像誠願者像示妙身安言行者
城東南三十餘里曷邏怛羅寺大臣所造以
名目之浮圖高百餘尺昔臣夜夢令造浮圖
從王請舍利也及旦至宮有人持舍利瓶臣
留舍利令人先入乃持瓶登塔覆鉢自開安
舍利訖王使追之石已合矣齋日放光流出

黑油夜聞音樂城西北二百餘里大雪山頂
 有龍池山下為龍立寺塔中有佛骨肉舍利
 升餘有時煙起或如火猛焰漸滅之時方見
 舍利狀如白珠繞柱入雲還下塔中城西北
 大河南岸古王寺中有佛弱齡亂齒長一寸
 餘又此東南往古王寺有佛頂骨一片廣寸
 餘色黃白髮孔分明佛髮青色螺旋右縈引
 長尺餘卷可寸許又西南古王妃寺金銅浮
 圖高百餘尺佛舍利升餘每十五日夜放光
 繞盤曉入塔中城西南比羅婆絡山云象頂堅也

永樂北藏

釋迦方志

盤石上起塔高百餘尺舍利升餘山北崑泉
 是佛受山神飯已漱口嚼楊枝因生今為茂
 林寺號楊枝也又從龍池東行六百餘里越
 雪山度黑嶺至北印度界已前諸邑並名胡
 國至此方合中間道也其地名曰濫波國北
度所橋也入元
三
空婆羅門地也
 其五印度之境周而九萬餘里三垂大海北
 背雪山北廣南狹如半月也七十餘國同一
 王命濫波國者在無熱池西倚北胡活國東
 南三垂黑嶺北約雪山都城周十餘里寺十

餘所僧數亦少多學大乘天祠數十異道特
 多東南百餘里踰大嶺大河至那伽羅曷國
屬北甲度古華氏城廣六百餘里長二百餘里山周四
 境都城周二十餘里寺多僧少天祠五所異
 道百人城東二里有石塔高三百尺編石特
 起雕鏤非常此即昔時值然燈佛敷鹿皮衣
 髮布掩泥之地也經劫猶存無憂王重法建
 此石塔以誌之每於齋日天輒雨華大眾集
 觀西有佛寺次南小塔是掩泥處王避大路
 遂僻建立城內大塔故基舊有佛齒別塔高

三丈餘云從空來既非人工寔多靈異城西
 南十餘里有塔是佛自中印度陵空來降迹
 處次東有塔是昔值然燈佛買華處城東南
 二十餘里小石嶺上塔高三百餘尺西南深
 澗瀑布飛流懸崖東岸石壁大洞穴是龍王
 所居門徑狹闇昔佛於此化龍留影煥若真
壁三形至誠請者乃暫明現窟外方石有佛足跡
 輪相發光窟西北隅塔者佛經行處又側髮
 爪塔又說蘊界塔窟西大盤石上有濯袈裟
 紋城東南三十餘里有醯羅城四周險固中

有重閣上安佛頂骨周尺二寸其色黃白髮
孔分明欲知善惡香泥印之隨心而現有佛
髑髏狀如荷葉色同頂骨有佛眼睛大如柰
許清白映徹並七寶小塔盛前三迹又以寶
函盛而緘封有佛大衣細氎黃色置寶函中
微有壞相有佛錫杖白鐵作環梅檀為筭寶
筒盛之近王恃力將入宮中尋復故處斯五
聖迹王令五淨行者執侍掌護有須見者稅
一金錢請印稅五科寶乃重觀禮彌繁閣西
北塔小而多靈人以手觸其上鈴震動自此

東南山谷中行五百餘里至健陀邏國北印度也
廣千餘里長八百里東臨信度河都城周四
十餘里少空荒寺有千餘所天祠百所異道
雜居城內東北故基是佛
鉢寶臺經數百年今在波斯王宮供養城東

南八九里畢鉢羅樹高百餘尺枝葉蒙密昔
四佛坐下見有坐像傳云賢劫諸佛皆坐其
下昔釋迦如來於此坐已告阿難曰後迦膩
色迦王集吾骨肉在此王後在南建塔基周
里半金銅相輪二十五重或云四十層者舉

高五百五十尺有舍利一斛初有化牧牛人
林間造三尺小塔王擲棄之乃於大塔第二
級下石基之側半現小塔疾者歸愈其大塔
東面石陛上昔有金色蟻大如指小如麥相
從齧石壁紋如鏤厠以金沙作二加跌佛像
高四尺六寸又於南面石陛畫佛丈六之形
昔有二貧人各施一金錢共畫一像請現神
變像即現曾以上分爲兩身合下爲一次南
百餘步白石佛像高一丈六尺面北放光夜
出繞塔賊欲盜物像出迎之賊退像還大塔

左右小塔數百莊工極巧香音兩異仙聖旋
繞佛記此大塔七燒七立佛法方滅已燒至
三今現營構西有故寺並前王所立諸大論
師世親菩薩如意論師脇尊者等造毘婆沙
處寺東北五十餘里渡大河至布羯邏伐底
城周十四五里東有四佛說法塔無憂王建
之高數百尺雕鏤希世城北五里故寺東塔
高數百尺即菩薩捨千眼處東有石塔高百
餘尺梵釋初作妙珍瑩飾佛滅寶變今爲石
也又西北行五十餘里塔者是佛化鬼子母

處又北五十餘里塔者是商莫迦菩薩

此云勝也

被王射處又東南約二百里跋魯沙城北東

二千餘里彈多落迦

即檀特也

山嶺上塔是蘇達

擎云善牙也棲隱之所婆羅門極男女處流血塗

地今諸草木皆同絳色巖間石室妃習定處

世三

世五

又西北行百餘里越小山至大山南有一寺

塔僧學大乘昔獨角大仙為女亂處

沙城東北五十里大山有大天祠祠東南行

百五十里至烏鐸迦漢茶城周二十餘里南

臨信渡河從此城北越山行六百里至烏仗

那國

北印度之正國也古謂烏長

山谷相連周五千里昔

輪王苑也土宜鬱金香夾蘇婆窣堵河王城

周十四五里寺有一千四百所僧有一萬八

千並大乘學今多荒少其習大乘統文畧義

經律傳訓有五部焉一法密部二化地部三

飲光部四說一切有部五大眾部天祠十餘

異道雜居

王都曹揭釐城其東五里大塔多瑞是佛昔

作忍仙為羯利

此云闍諍

王支解之處城東北二

百六十里入大山至阿波邏龍泉即前河源

也派流西南春夏合凍晨夕飛雪佛昔化暴
 龍金剛以杵擊崖龍怖歸依請佛放雨乃許
 之令人收糧十二年一雨水災又泉西南三
 十餘里水北岸大石上佛伏龍已留迹示之
 隨心長短順流三十餘里有佛濯衣石袈裟
 紋如鏤城南四百餘里醯羅山谷尋水逆流
 東上華果緣崖或聞誼話音樂聲方石相接
 是佛昔聞半偈捨身處城南二百餘里大山
 側有摩訶伐那寺此云大林佛昔為薩縛達羅王
 施即一切失國避地為貧人故令縛送處寺西

北下山四十餘里有寺塔高百餘尺側方石
 上佛足迹相放光照寺為天說本生處塔下
 有石黃白津膩是佛昔為聞法析骨寫經處
 又西七十里塔是佛昔為尸毘迦王此云割
 身代鴿處又西二百餘里珊尼羅闍川薩裊
 殺地言蛇藥也寺塔高八十尺佛昔為帝釋身作
 大蟒僵死以施貧疫處側有蘇摩塔是佛變
 為蘇摩蛇斃者病愈處川北崖塔病求多愈
 又側有涌泉佛昔為孔雀王喙啄而出用救
 疾處城西南七十里大河東塔高六十尺是

盟坦羅犀那言上王所造佛令以舍利與王
 分在河濱立塔王以白象負歸象變為石城
 西五十餘里度大河有盧醯坦迦塔言赤高
 五十餘尺佛昔為慈力王刺血飲五藥又處
 城東北三十里遏部多言奇特也石塔高四十尺
 佛為人天說法塔從地出現即存焉又西度
 大河四十里寺精舍有阿縛盧枳抵云觀伊
 濕伐羅云自菩薩像即觀世感靈遠照此西
 百五十里山嶺龍池周三十餘里王城東北
 踰山谷逆上信度河途路極險乘絙棧梁鎖

杖躡陞千有餘里至達麗羅川烏仗那舊所
 都也大寺中有刻木梅坦麗耶古云彌勒菩
 薩像金色晃朗高百餘尺末田底迦即末阿
 羅漢所造以通力引匠升覩史多即兜天三
 返觀相乃成其好自有此像法方東流也東
 行越嶺逆信度河履險飛梁五百餘里度河
 又東度縛芻河登危至鉢露羅國周四千里
 大雪山中東西長寺數百僧數千學師戒行
 多濫其國北印度所統多冰雪其土出金如
 火色北對婆羅犀羅大嶺還從健馱邏國烏

鐸迦城南度信度河廣四里許西南流清澄如鏡毒龍惡獸窟穴其中有持舍利寶華者船多沉沒度河至坦又始羅國北印度也周二千餘里都城周十餘里寺多僧少並大乘學城西北七十餘里有伊羅鉢龍池周百餘步池東南三十里兩山間塔高百餘尺佛昔記慈氏興世四大藏者此地出一故有振動斯周百步曾無一搖有欲發者地震人仆城北十二里塔於齋日常放神光仙華天樂近有癩者於塔禮懺除穢塗香不久便愈身又香潔

昔佛為戰造羅鉢刺婆王云月光也以頭施處凡經千苑即塔名月光也城東南山塔高十丈許扶目王所治育王為造又東南越山谷七百餘里至僧伽補羅國北印度也周三千五百里西臨信度河大城周十四五里城東五十里有石塔高二十餘丈佛所遊處池沼十餘四巴蓮華彌覆其內從此南返至坦又始羅國北界度信度河東行二百餘里度大石門是摩訶薩埵王子捨身飼虎處東有寺僧百餘又南百五十里石塔者薩埵以竹自刺血啗

獸處地及草木今猶絳色次北石塔高二十
餘丈放光開信病歸多愈又東五十餘里孤
山有寺塔高二百餘尺僧徒二百人並大乘
學佛昔化藥又不食肉處又東南山行五百
餘里至烏刺尸國北印度也周二千餘里山阜相
屬都城周十八里不信佛法屬迦濕彌羅有
佛塔高二十餘丈育王所造有寺僧少學大
乘教又東南登山乘鐵橋千餘里至迦濕彌
羅國北印度也古曰罽賓周七千里四面負山雖有門
徑狹而劣通城西臨大河長十三里廣四里

許寺百餘僧五千餘人土出龍種馬鬱金花
珠有四浮圖各有舍利一升餘佛滅後第四
百年脇尊者年八十方出家證無學將五百
羅漢來此造十萬頌鄔波弟鏢釋素旦纜藏
即優婆提舍論節多羅藏異名也次造十萬頌毘奈耶毘婆
沙論次造十萬頌阿毘達磨論凡六百六十
萬言備釋三藏新城東南十餘里故城北大
山陽寺塔僧徒三百人佛牙長寸半色黃白
齋日便放光又南十五里有觀自在菩薩立
像有願見者斷食便覩

王城西北二百餘里至商林寺城西百五十里大河北接山有寺僧百餘人從此西南越山行七百餘里至半笈蹉國北印度屬罽賓周二千餘里寺有五所多山川東南行四百餘里至遏邏閣補羅國非三北印度乃荒服國也周四千餘里都城周十餘里寺十所僧甚少天祠一所外道甚多自濫波達此形體鄙薄非印度之正境也從此下山東南而行並是大川達遠無畔唯以河國而分界部雖有小山並是孤住自此以北通連雪山連達神州涼部以南諸雪

山也案此山亦即瞻部之巨鎮地者也於此城東南下平度水行七百餘里至磤迦國北印度也周萬餘里東據毘播奢河西臨信度河都城周二十餘里俗少信佛多事天神寺有十餘天祠數百城西南十五里奢羯羅故城寺塔高二十餘丈昔四佛說法經行處又西北六里許塔高二十餘丈亦四佛說法處又新都城東北十餘里石塔高二十餘丈多有舍利齋日放光東行五百餘里至那僕底國北印度也周二千餘里都城周十四五里寺十天祠

八城東南五百餘里至闍林寺周二十餘里
佛舍利塔數百千區并石室等僧有三百人
小乘說有部也德行清高小學之博賢劫千
佛並此說法釋迦滅後第三百年迦多衍那
迦旃延也於此造發智論寺塔高二十餘丈有四
佛行坐迹處從此東行百五十里至闍爛達
那國北印度也東西千餘里南北六百里都城周
十餘里寺有五十僧二千餘人大小專門天
祠三所外道五百人東北越山七百餘里至
屈露多羅國北印度也山周四境都城周十四五

里寺二十餘僧千餘人多大乘學天祠十五
異道雜居出火珠兩石俗癯且廬城內有塔
記佛曾遊於此說法自斯北行近二千里山
路危險至洛護羅國北印度也又北山行二千餘
里雪寒更甚達秣邏娑國又名三波訶非印度攝又從
窟露羅南行七百餘里越山濟河至設多圖
盧國北印度也周二千餘里西臨大河都城十七
八里佛法大盛城內外寺十所僧亦少耳城
東三里塔高二十餘丈育王所造傍有四佛
行坐迹自此西南行八百餘里至波狸夜但

羅國入中印度也周三千里都城周十五里寺有

八所僧亦少耳俗信外道天祠十所異道千

餘土有稻種六十日收東行五百餘里至秣

菟羅國中印度也古云摩偷羅周五十餘里都城二十

餘里寺二十餘僧二千餘人大小兼學天祠

五所異道雜居土植菴沒羅果小者生青熟

黃大者始終青色城中三塔四佛遺迹甚多

及舍利子沒特伽羅子謂目捷連也滿慈子富樓那也

優婆釐優波離也阿難陀羅怙羅曼殊室利等諸

塔每三長月六時諸僧尼集阿毘達磨衆供

養舍利弗塔習定衆供目捷連塔誦經衆供

滿慈塔毘奈耶衆供優波釐塔尼衆供阿難

塔未具衆供羅怙塔大乘衆供諸菩薩塔尋

斯諸塔不必遺身但立像設供用呈心造如

羅怙文殊未取滅度則可知矣城東六里有

山崖寺是尊者烏波趨多云近護也之所造也有

佛指爪塔寺北石巖室高二丈廣三丈細籌

四寸填之近護導夫妻俱證羅漢者送一籌

乖此不在室記又室東南二十餘里大涸池

側有塔佛曾遊此有獼猴持蜜施佛佛令水

永樂北藏

釋迦方志

第一三三册

釋迦方誌卷中

壁四

唐終南太一山釋道宣撰

遺跡篇第四之中

宰祿勒那國中印度也周六千餘里少荒東境臨

殑伽河即古恒河北接大山城東南閻牟那河從

國西北山中出中境而流都城周二十餘里

東臨閻牟河寺有五所僧千餘人多小乘學

天祠百餘異道甚多河西大寺東門外塔佛

曾於此說法度人其側有佛髮爪塔閻牟河

東八百餘里至殑伽源廣三四里東南入海

廣十餘里水色滄浪味甘砂細隨水而流俗

謂福水有沐除罪或有輕命自沉云生天受

樂有僧伽羅國提婆菩薩化外道受正法處

度河東至秣底補羅國中印度周六千餘里都

城周二十餘里不信佛而敬天寺有十餘僧

八百人多小乘者天祠五十餘異道雜住國

西北境殑伽東岸摩裕羅城周二十餘里出

鑰石水精城側臨大河有大天祠多有威靈

有池編石為岸引河為浦五印度以為殑伽

河門生福滅罪處常有百千人澡濯從摩裕

北行三百里至婆羅吸摩補羅國北印度周四

千餘里山周四境都城周二十餘里寺五僧

少天祠有十異道雜住國北大雪山有蘇伐

刺拏瞿咄羅國言金氏也出上黃金東西地長即

東女國非印度攝又即名大羊同國東接土

蕃西接三波訶北接于闐其國世以女為王

夫亦為王不知國政男夫征伐種田而已又

從末底補羅國東南行四百餘里至瞿毘霜

那國中印度周二千餘里都城十四五里寺二

所僧百餘人而習小乘天祠三十餘異道雜

住城固險峻其側古寺塔高二十餘丈佛曾

於此一月說法有髮爪二塔各高丈餘旁有

四佛坐迹又東南行四百餘里至一聖醯掣

咄邏國中印度周三千餘里都城周十七八里

寺十餘所僧有千餘習小乘正量部天祠有

九外道三百餘人城依險固其外池側佛為

龍說法七日處立塔側有四佛行坐迹立塔

表之又南二百七十里度殑伽河西南至毘

羅剛拏國中印度周二千餘里都城周十餘里

信外道少敬佛法寺三所僧徒三百人皆大

乘學天祠五所城中寺塔高十餘丈佛曾於
此七日說蘊界法四佛行坐遺迹尚存於此
東南行二百餘里至劫比他國中印度古
僧伽舍也周
二千餘里都城周二十餘里寺有四所僧千
餘人天祠十所同事大自在天皆作天像其
狀人根形甚長偉俗人不以為惡謂諸衆生
從天根生也城東二十餘里大寺中僧數百
人淨人數萬頭皆宅寺側大垣內有天帝造
三寶階中階黃金左以水精右用白銀南北
而列東面下地是佛從逝多林即祇
陀林昇天善

法堂為母三月說法下降處百年前階尚在
今並沒盡後王傲之猶高七十餘尺上起精
舍側有石柱光潤映現隨其罪福影出柱中
育王所造階側浮圖四佛行坐迹也佛澡浴
處立塔其所有佛入室精舍又其側佛經行
石基長五十步高七尺足所履處皆蓮華文
基左右小塔梵王所造次前是蓮華尼化為
輪王先見佛處佛告尼曰非汝先也有蘇部
底須菩
提也宴坐石室知諸法空見吾法身次東
南池有龍居焉恒護聖迹不可輕犯從此西

北減二百里至羯若鞠闍國

中印度曲女城也

周四

千餘里都城西近旃伽河長二十餘里廣四

五里邪正相半寺百餘僧徒盈萬大小兼學

天祠二百餘所異道數千人即統五印度之

都三也號尸羅迭多

言戒日也

吠奢姓初欲登位

旃伽岸有觀自在像乃請之告曰汝本此林

蘭若比丘金耳月王旣滅佛法王當重興愍

物在懷方王五境慎勿昇師子座及稱大王

號也王乃共童子王平殄外道月王徒衆又

約嚴令有噉肉者當截舌殺生當斬手乃與

寡妹共知國事於旃伽側建千浮圖各高百

餘尺城邑鄉聚達巷交衢立精舍儲食止醫

藥惠羈貧聖迹之所皆為立寺二十年來五

年一會傾及府藏拯濟羣有唯留兵器用備

不虞初作會日集諸國僧三七日中四事供

養令相論議若戒行貞固道德優洽者昇師

子座王便受戒清淨無學示有崇仰穢行彰

露者驅出國界諸有王臣植福無怠者携手

同坐異此不顧王巡省方俗不常其居行必

四兵導引嚴設汎舟乘象擊鼓吹螺象軍八

萬以威四遠唯兩三月不外遊行宮中每日
飯諸沙門僧有千人婆羅門五百日分三時
一時理務兩時營福又絕血食日例一頓於
河西寺東起寶臺高百餘尺中有等身金像
次南起寶壇浴佛像處於此東北十五里許
別築行宮從寺至宮夾道爲閣窮諸彫飾樂
妓不移迺奏而已又以三尺隱起金像載以
大象寶幔其上王爲帝釋像執寶蓋左侍有
迦摩縷波國拘摩羅王言童子也作梵王像執拂
右侍各五百象軍被鎧同衛前後各百大象

樂人於上鼓奏音聲戒日王又以真珠雜寶
金銀諸華隨出四散供養三寶其五印度尼
寺希少縱有尼者與僧同門食亦同處無虧
戒約然童子王刹帝利姓語使人李義表曰
上世相承四千年先人神聖從漢地飛來王
於此土城西北塔育王所造昔佛於此七日
說法其側有髮爪塔四佛行坐迹又南臨苑
伽河三寺同垣異門佛像嚴麗佛牙長寸半
光色變改寶函盛之遠近瞻者日有百千守
者煩撓重稅金寶而樂禮者不辭重貨齋日

便出置高坐上散華雖積牙函不沒寺僧清
 爾淨人數千戶寺前左右精舍高百餘尺石
 基甃室中象寶莊或純金銀次東南大精舍
 石基甃室高二十餘丈是佛六月說身無常
 苦空不淨處又有四佛行坐迹在城東南六
 七里堊旃伽南岸上城東南百餘里有納縛提
 婁城據旃伽河東岸三寺同垣異門周二十
 餘里次前二百餘步塔高二十餘丈佛曾七
 日說法處中有舍利時放光明其側四佛行
 坐迹寺北四里臨旃伽岸塔高二十餘丈佛

曾七日說法五百餓鬼解悟生天其側又有
 髮爪塔次側又有四佛行坐迹又東南行六
 百餘里度旃伽河南至阿輸陀國中印周五
 千餘里都城周二十餘里寺有百餘僧三千
 餘人大小兼學天祠有十異道少耳城中故
 寺是伐蘇畔度菩薩言世親也數十年中作大小
 乘論處城北五里旃伽岸大寺中塔高二十
 餘丈佛為天人三月於此說法側有佛塔四
 佛行坐迹寺西五里有佛髮爪塔
 城西南五里大菴沒羅林中故寺是阿僧伽

菩薩

云無著也

夜昇天宮於慈氏所受瑜伽莊嚴

大乘經論及中邊等書為衆說林西北百餘

步佛髮爪塔自此東行三百餘里度旃伽河

北至阿耶穆佉國

中印度

周二千五百里都城

臨河周二十里寺五所僧千餘人習學小乘

天祠十所異道雜居

城東南臨旃伽塔高二十餘丈佛曾三月說

法處有髮爪青石塔有四佛行坐迹又東南

行七百餘里度旃伽河南閻牟那北至鉢羅

伽耶國

中印度

周五千餘里都城據兩河交周

二十餘里寺二所僧少天祠數百異道特多

城西南臨閻牟河曲二三千東北流合間

有瞻博迦華林中塔高十餘丈佛曾於此降

外道處有髮爪塔經行迹又有提波菩薩作

廣百論處城中天祠堂前大樹枝葉蒙密食

壁四

六

人鬼依之左右遺骸為積人至祠中無不輕

命上樹投下為鬼所誘城東兩河間交廣十

餘里土地平塏細沙彌布古今王豪諸有捨

施莫不止焉號大施場戒日大王亦修此業

場東合流口日數百人自溺而死彼俗名為

生天所也有欲行法七日於此絕粒自沉中
 流遠近相趣乃至山獫野鹿羣遊水濱絕食
 沉水當戒日王行施之時有二獼猴雌為狗
 殺雄者負屍擲此河中其又自餓累日而死
 自此西南大林野行五百餘里至憍償彌國
 度中甲周六千里都城周三十餘里寺十餘僧
 三百餘人天祠五十外道衆多城內故宮大
 精舍高六十餘尺刻檀佛像上懸石蓋即鄔
 陀衍那王此古優陀延也之所造也靈光間起
 諸王以力欲舉終莫之移昔佛為母上天說

法王請目連神力接工就天模相及佛下天
 像便起迎佛慰喻曰方為佛事舍東百餘步
 四佛行坐迹佛浴室井今猶充汲城內東南
 隅具史羅長者宅有佛精舍髮爪塔其大塔
 側又有四佛行坐迹城西九里石窟佛曾遊
 此伏毒龍也側有大塔高二十餘丈旁有佛
 經行迹及髮爪塔病求多愈釋迦遺法滅在
 此國貴賤入境自然感傷窟東北大林中行
 七百餘里度菟伽北岸至迦奢布羅城周十
 里許是護法菩薩伏外道處塔高二十餘丈

佛曾於此六月說法有經行迹及髮爪塔自
北行一百八十里至鞞索迦國中印度周四千
餘里都城周十七里寺二十僧三千人天祠
五十外道巨多城南道左右寺塔高二十餘
丈佛曾於此六年說法側有奇樹高七十尺
春冬不改是佛齒木棄而茂生諸邪見者競
來殘伐尋生如故側有四佛行坐迹并髮爪
塔基角相連林池交影自此東北五百餘里
至室羅伐悉底國中印度即舍衛也周六千餘里都
城荒毀故基周二十餘里寺數百所僧徒少

天祠百餘外道甚眾荒城故殿東基上小塔
是鉢羅犀那恃多王古云波斯軍也為佛造堂
處次側故基上塔是王為佛姨母鉢羅闍鉢
底古云波闍波提此云生主比丘尼造精舍處次東塔是
蘇達多云善施也之故宅也側有大塔是鶻窣利
摩羅言指髮也捨邪處也城南六里許逝多林是
給孤園太子所造寺也今荒廢尚有石柱高
七十餘尺育王造之輓室一存餘並湮沒室
中有為母說法金像東北有佛洗病僧塔西
北有目連舉身子衣塔不遠并塔佛所汲用

又舍利弗與佛經行道說法處並有表塔靈
 樂異香常降其所又外道殺女以謗佛處立
 塔表之寺東百步大坑是調達欲毒害佛生
 陷處南有大坑是瞿伽離比丘毀佛生陷處
 又南八百步大深坑是戰遮婆羅門女毀謗
 佛生陷處此三坑皆洞達無底洪雨大注終
 無停偃寺東七十步精舍名曰影覆高六十
 尺中有東面坐像與外道論處次東天祠量
 同精舍初日影西不蔽佛舍晚日蔭東遂覆
 天祠又東四里大涸池是毘盧釋迦王

舊云留維

也陷入地處後人立塔記之又有身子初造
 寺時與外道較處亦立塔記寺西北四里有
 得眼林中有佛經行迹塔其緣勝軍王扶五
 百賊眼聞佛慈力一時平復捨杖遂生眼根
 城西北六十里故城是人壽二萬歲時迦葉
 波佛本生處其北有塔即此佛全身舍利之
 所育王造表之又東南行五百餘里至劫比
 羅伐罕堵國中印度古云迦毘羅也周四千餘里空城
 十數並無入住宮城周十五里許以甄成之
 故寺千餘宮城一寺僧三十餘天祠二所外

道雜住城內正殿基上精舍中作王像其側
是摩訶摩耶言大術也夫人寢殿基上精舍作夫
人像其側精舍中作菩薩像神降之相彼執
不同上座部云當唐國五月十五日諸部又
云當此五月八日此蓋聞見之異耳其側有
仙相塔城南有塔是太子搆力擲象越城墮
地爲大坑處側有精舍作太子像及受業像
其傍精舍是妃寢處作耶輸陀羅并羅怙羅
像別本云太子初夜開城北門出去又城東
南隅精舍中作太子乘白馬乘空踰城處四

壁四

九

城門各有精舍作老病死沙門像城南四里
尼拘盧林塔佛得道與天人說法之所城南
五十里故城中塔是人壽六萬歲時迦羅迦
村馱佛本生城城東南塔即此佛遺身也無
憂王於前建石柱高三丈餘又東北三十餘
里故城中塔是人壽四萬歲時迦諾迦牟尼
佛本生城城東北塔即此佛遺身也無憂王
爲建石柱銘記之高二丈餘城東北四十餘
里有太子坐樹下塔大城西北數百千塔是
誅釋子塔有四釋子拒軍城人不受被放出

境一為烏仗王二為梵衍等王至今不絕城南尼拘律樹塔是佛初來見父王處城南門外塔是搆射處東南三十餘里是太子射矢没地因涌泉流俗傳箭泉病飲多愈或持泥傳額隨苦皆愈又東北九十里臘伐尼林釋種浴池華水相映其北二十五步無憂華樹今已枯悴佛誕處也有說云當此三月八日者上座部云當此三月十五日者次東有塔二龍浴太子處是日生已不扶而行四方各七步所蹈之處出大蓮華既右脇生天帝衣

接四王捧之置金几上凡施四塔并立石柱表之旁有小河東南而流俗號油河是太子產已天化此地先潤令沐以除風虛令變水河尚膩如油從此東行二百餘里荒林中至藍摩國中印多空城東南佛塔減百尺昔初八分之一舍利也靈光時起側有清池龍變為蛇出繞其塔野象採華以散之無憂王欲開龍護不許又東大林百餘里大塔是太子至此解寶衣中末尼珠付闍鐸迦還父王處又東有瞻部樹枯株尚存有小塔是太子以

餘衣易鹿皮處其側塔者剃髮處年目不定
或云十儿二十九者又東南野行百九十里
尼拖陀林塔高三丈餘昔人於佛焚地收餘
灰炭於此起塔病者新愈有四佛行坐迹塔
高百餘尺左右數百小塔又東北大林路險
五百里至拘尸那揭羅國度中印城頽荒人物
少也內東北角塔是純陀故宅其井猶美營
供所穿城西北四里度阿恃多伐底河此云
有金也近西岸娑羅林兩林間相去數十步
中有四樹特高大甄精舍中作佛涅槃像北

首而卧旁塔高二百餘尺前有石柱記佛滅
相有云當此土三月十五日者說有部云當
此九月八日諸部異議云至今貞觀二十年
則經一千二百一十二年矣此依菩提寺石
柱記也或云千三百年或千五百餘年或云
始過九百未千年者精舍側有佛昔為雉王
救火及鹿救生各立一塔次西塔者是蘇跋
陀羅此言善賢滅證處次有一塔是執金剛神躡
地處次側一塔是停棺七日處次側一塔是
阿泥樓陀上天告母降來哭佛處城北度尼

連禪那河三百步塔者是佛涅槃般那此言焚燒處也地今黃黑土雜炭有祈感者咸獲舍利次側一塔佛為大迦葉波現雙足處次又一塔前立石柱刻記八國分舍利事此西南行二百餘里至大邑又大林行五百餘里至婆羅痾斯國中印度古波羅奈也周四千餘里都城西臨苑伽河長減二十里廣六里許人居盛滿多信外道寺三十餘僧三千餘並小乘正量部天祠百餘外道萬餘多事大自在天根也大城中天祠二十所天根高百餘尺城東北婆

羅痾斯河西塔育王造高十餘丈前立石柱碧蘚現佛河東北十餘里鹿野寺也區界八分連垣同堵層軒重閣僧徒一千五百人並小乘正量部有佛圖高二十餘丈甄龕四合節級百數皆隱起金像鑰石佛等次西南塔高百餘尺前有石柱高七十餘尺洞澈清淨誠感像現隨其善惡即成道已初轉法輪處其側三塔即昔三佛行坐處傍有諸塔五百獨覺入滅處又側一塔慈氏菩薩受記處又西一塔是佛過去為護明菩薩迦葉波佛授

今成佛處次南四佛經行處長五十步高七
天青石積成上作釋迦經行像像形特異肉
髻上髻髮頭抽出神而有徵寺迹極多精舍
浮圖乃數百事不可具也寺西清池周二百
步佛嘗盥浴次西小池佛嘗滌器次北小池
佛嘗浣衣三池龍止味甘且淨有慢觸者金
毘羅獸即而害之側有方石上有佛袈裟文
迹外道兇人有輕蹈者池龍輒興風雨側有
浮圖佛曾作六牙象王見獵者法衣故拔牙
與處側又一塔佛昔為烏與獼猴象相問誰

室四

十二

大處又大林中塔佛與調達昔為鹿王佛代
孕鹿命處鹿野之號因而生焉寺西南三里
大塔高三十餘丈基峙壯麗側又一塔是五
人迎佛處大林東三里塔者佛昔為兔與諸
獸聚自知形小燒身饋之因感天帝下讚故
便月輪有兔像現寺東順苑伽河三百餘里
東至戰主國度中印周二千餘里都城臨苑伽
河周十餘里人盛滿寺十所僧減千人並小
乘天祠二十所異道雜居城西北寺塔佛舍
利一升昔佛於此七日說法并四佛行坐迹

有慈氏菩薩像形小而威德大城東北二百餘里至阿避陀羯刺拏寺

云不穿耳

因緣北方僧

也寺東南度苑伽河百餘里至大邑河北岸那羅延天祠重閣甚麗又東南三十餘里有降鬼塔半已陷地前建石柱高二丈餘即佛

壁門

十三

為噉人鬼說法處鬼置石坐千數茂林清池不遠數寺皆有僧住學大乘者又東南度河百餘里塔者即分舍利瓶及餘舍利也每齋日放光又東北度苑伽河百五十里至吠舍釐國

中印度古云
毘舍離也

周五千餘里邪正兼半寺

數百現存五三僧少耳天祠數十露形多矣城已頽毀故基周七十許里宮城周五里許少人居住宮城西北六里寺塔是說淨名處又東身子證果塔又東大塔是王得一分舍利一斛許無憂王取九升均造餘塔後更有土欲開地震遂止西北有塔石柱高六丈次南獼猴為佛穿池池西羣猴持佛鉢上樹取蜜處池南猴奉蜜處各有塔記寺東北四里許塔是淨名故宅基尚多靈神其舍壘甄傳云積石即說法現疾處也近使者王玄策以

笏量之止有一丈故方丈之名因而生焉并
長者寶積宅菴羅女宅佛姨母入滅處皆立
表記寺北四里塔佛將往拘尸城天人送泣
處次復一塔是佛最後觀城邑處次南是菴
羅女以園施佛處其側一塔是佛三告阿難
住壽涅槃處又側一塔是千子見父母處即
賢劫千佛也東故重閣講堂基塔時放光明
是佛說普門經處城西北六十里大塔是佛
別乘占婆子處大城西北減二百里故城塔
佛說本生曾於此為大天輪王事國城東南

十五里大塔是七百賢聖重結集處又南減
百里大寺層臺重起僧學大乘四佛行坐迹
側又一塔是佛南趣摩揭陀北顧吠舍釐城
中息迹處寺東三十里旃伽河南北岸各一
塔是阿難陀分身與二國處從北岸東北行
五百餘里至弗栗恃國北印度也人十四周四千
餘里東西長寺十餘僧減千人大小通學天
祠數十外道衆矣故宮城中有三千家旃伽
東北岸塔高二丈餘南望長流佛度五百漁
人處由捕得大魚十八頭頭各兩眼也又東

北百餘里故城西塔高百餘尺佛嘗六月說
 法度人又北百五十里佛髮爪塔又西北千
 五百里入山谷至尼波羅國北印周四千餘
 里在雪山中都城二十餘里雜信寺及天寺
 極多僧二千餘人大小兼學王純信佛城內
 有閣高二百餘尺周八十步上容萬人面別
 三疊疊別七層徘徊四廈刻以奇異珍寶飾
 之城東南不遠有水火村東一里許有阿耨
 波沱水周二十步旱澇湛然不流常沸家火
 投之遍池火起煙焰數尺以水洒火火更增

熾碎土以投亦即然盡無問投者並成灰燼
 架釜水上煮食立熟云此水中先有金匱前
 有國王將人取之匱已出泥人象挽之不動
 夜神告曰此是慈氏佛冠下生擬著不可得
 也火龍所護城南十餘里孤山特秀寺居重
 疊狀若雲霞松竹魚龍隨人馴附就人取食
 犯者滅門比者國命並從此國而往還矣今
 屬吐蕃又從吠舍南百五十里度苑伽河至
 摩揭陀國即常所謂摩竭提王舍城也
 摩揭陀國中印度也古者訛耳周五千餘里城少人居

巴落極多寺五十餘所僧徒出萬多大乘學
天祠數十異道甚多故城在王舍城山北倚
東二百四十里北臨殽伽河周七十餘里人
壽萬歲時號拘蘇摩補羅城言香茅華宮也
人壽數千歲時更因波吒釐樹名波吒釐子
城古名巴連弗者訛也故宮北石柱高數丈
無憂王作地獄處佛涅槃後第一百有阿
輸迦王此言無憂即頻毘娑羅王之曾孫自王舍
城遷都此城重築外郭出異種稻粒大而美
光色奇異名供大人米也宮北臨殽伽河小

城千餘家現存獄石柱南大塔寶飾覆鉢石
作欄檻即八萬四千之一也安佛舍利一升
時有光瑞即見憂遇近護羅漢役使鬼神所
營其側精舍中有大石是佛欲涅槃北趣拘
尸南顧摩揭故蹈石上之雙跡也長尺八廣
六寸輪相華文十指各異近為羯羅拏蘇伐
刺那言金耳國設償迦王言月也毀壞佛跡
鑿已還平紋彩如故乃捐殽伽河中尋復本
處次側有四佛行坐塔故宮北大石室即育
王為弟所造次有大水槽育王飯僧者宮西

南小石山周巖澗谷數十石室育王為近護
羅漢役鬼所為其傍有石池俗名聖水飲者
病愈山西南五塔面各數百步育王建八萬
四千塔已尚餘五升舍利更造此塔靈異間
起有王將此作難陀王五藏興軍掘之地震

聖四

十六

山傾塔中大呼士卒僵仆故城東南屈屈吒
陀濫摩寺此言昔有論議屈於外道十二年
來不擊捷椎有南印度那伽闕刺樹那菩薩
此言龍猛來至伏諸外道始擊捷椎故塔名
或云龍樹擊捷椎也次北有鬼辯塔馬鳴事城西南隅

二百餘里古寺塔中四佛行坐跡又寺西南
百餘里大寺僧徒千數並學大乘合有四院
觀閣三層崇基重戶中門三精舍金銅隱起
中有立像高三丈左多羅菩薩右觀自在並
鑄成三所各有舍利一升光相時起寺
西南百里大山上石塔高一丈餘佛於大磐
石上入定經宿諸天雨華以感慕故起寶塔
高一丈許今變為石唯遙望見煙霞止居靈
聖龍蛇窟穴鷲鳥猛獸古今無人達者山東
崗塔佛於此立觀摩揭國處山西北三十餘

里山寺負嶺踈崖置閣大乘學瞿摩末底菩薩此言德慧伏外道處今有僧五十餘人又西南二有餘里孤山寺有論師尸羅跋陀羅此言戒賢今見在初伏外道得邑捨而造之其處竦一危峯如浮圖形置佛舍利又西南

壁四

十七

五十許里度尼連禪河有伽耶城少人物婆羅門千餘家住仙人之胤也王所不臣衆咸加敬城北三十餘里清泉俗傳聖水飲濯之者罪消也城西南六里許伽耶山也谿谷杳冥世謂靈嶽自古君王登封告成也頂有石

永樂北藏

釋迦方志

塔高百餘尺時放奇光佛於此說寶雲等經山東南尼連河減二里許至鉢羅笈菩提山言前正覺也佛將證先登因名也

佛自東北崗上頂欲入金剛定震地投山神懼告佛又至西南半崖中面澗坐石地山又震淨居天告曰此西南十五里近苦行處畢鉢羅樹下金剛座處是菩提座三世諸佛咸此成覺佛方就之仍為石室龍留影也今或有見者及無憂興世於諸靈跡皆表浮圖雨諸天華每竟安居法俗同往登山供菩提樹

其菩提樹周垣甃壘以崇固之東西閣周可
 五百四十步奇樹名華連陰列植正門東開
 對尼連禪那河南門接大華池西阨險固北
 門通大寺其孺院內聖迹諸塔精舍星張相
 布樹垣正中金剛座者賢劫初成與大地俱
 大千界中下極金輪上至地際金剛所成周
 百餘步千佛同坐八金剛定故因號焉即證
 道之所也又曰道場大地震時獨無搖也佛
 證覺後自入末法沙土彌覆不見本質傳佛
 說耳遂以兩軀觀自在菩薩南北標界面南

而坐記云此像身沒佛法當滅南隅像者今
 沒曾臆
 佛在世時菩提樹高數百尺枝黃葉青冬夏
 不改佛涅槃至葉凋尋復後為無憂王伐截
 於西數十步聚而燒之用以祠天煙焰未止
 忽生兩樹壁四猛火之中茂葉同榮十八因謂灰菩提
 樹王親信生以香乳澆餘根者至旦樹生如
 本王妃忿之又夜重伐王重祈請以乳灌之
 不日還生壘石周垣基高丈餘近為金耳國
 月王又伐此樹掘至泉水不盡根底乃縱火

焚之又以甘蔗澆之令焦爛絕其本也數月之後為補刺拏伐摩王此言滿曹即無憂王之玄孫也聞樹被誅舉身投地請僧七日經行繞樹大坑以數千牛乳灌之經六日夜樹生丈餘恐後翦伐周峙石垣高二丈四尺樹今出於石壁上二丈餘圍可三尺樹東青甕精舍高百六十餘尺基廣二十餘步上有石鉤欄繞之高一丈層龕皆有金像四壁鏤諸天仙上頂金銅阿摩勒迦果即此所謂寶瓶及寶臺也東南接為重閣三層簷宇特異並

金銀飾鏤三重門外龕中左觀自在右慈氏像並鑄銀成高一丈許無憂王造也精舍初小後因廣之內置慈氏像有婆羅門應募造之唯須香泥及一燈內精舍中六月閉戶作之乃成尚餘四日僧咸恠之因開觀覓見像儼然東面加坐右足加上左手斂右手垂不見作者坐高四尺二寸廣一丈二尺五寸像高一丈一尺五寸兩膝相去八尺八寸兩肩六尺二寸相好具足唯右乳上圖飾未周更填眾寶遙看其相終似不滿有僧夢匠者云

壁四

十九

我是慈氏恐工拙思故自寫之言垂手者像佛語魔指地爲證近被月王伐樹令臣毀像王自東返臣本信心乃於像前橫施輓障心愧闇故置燈於內外晝自在天像功成報命月王聞懼舉身生炮肌膚皆裂尋即喪沒大臣馳返即除壁障往還多日燈猶不滅今在深室晨持鏡照乃覩其相見者悲戀敬仰忘返

佛以唐國三月八日成道上座部云當此三月十五日成道時年三十者或云三十五者

斯之差互彼自不同由用曆前後故有此異猶神州曆元各各不同三代定正延縮不等何足怪也且據一相取悟便止佛成覺已七日寂定至於樹北七日經行南北往來十餘步許異華隨跡有十八文後人甄壘爲基高三尺餘俗云聖跡基也表人命之脩短者先發誠願以繩度之隨壽短長增減有驗此北道左磐石上大精舍作佛上望仰觀樹相爲報恩像當時七日目不暫捨樹西大精舍鑰石像東面立飾奇珍前有青石奇文異彩初

成道日梵王起七寶堂帝釋起七寶座佛據
上七日思惟放光照樹今寶為石樹南浮圖
高百餘尺初佛於河沐已將坐念草帝釋化
人以姑尸草此言
吉祥以奉佛處育王造塔表之
次東北塔是證果時青雀來繞羣鹿呈祥處

雙四

二十

樹東大路左右各一塔是魔王媯佛衰退處
樹西北精舍中迦葉波佛時放光明俗云至
誠七繞生得宿命智又垣西北塔鬱金香泥
高四丈餘樹垣東南隅尼拘盧樹側有塔精
舍中有坐佛初證果時大梵王請轉法輪處

垣內四隅皆有塔初佛受草趣樹先至西南
地動又向西北又東北又東南並地為震即
西北至樹下東面坐金剛座上地方安靜故
立塔記垣外西南二牧牛女宅處其側煮糜
處又側佛受糜處皆立表塔樹南門外大池
周七百餘步清澄魚龍所宅次南池者帝釋
所造為佛濯衣池西大石天帝雪山將來為
佛曬衣側塔是佛納故衣處次南林中一塔
佛受貧母施故衣處
化池東林龍池清黑味甘岸西小精舍中像

佛初成道此坐七日入定龍王繞佛七帀化
 多頭蓋佛處龍池東林精舍作佛羸瘦像側
 有經行跡七十餘步南北各有畢鉢羅樹往
 來攀而後起即苦行六年日食一麻麥處今
 有疾者香油塗像多愈又有五人住處塔又
 東南塔佛入尼連河浴處次近河佛食乳糜
 處於道樹下受解脫也其側二塔長者獻蜜
 麩處樹東南塔是四天王四方來各持金鉢
 及諸寶鉢佛皆不受乃各持石鉢紺青映徹
 方總受之按為一鉢外現四際其側有塔成

道後為母說法處現神變處

度優婁迦葉千人處又西北伏火龍處又五
 百獨覺入滅處目真龍池南迦葉謂佛瀟水
 處魔怖佛處皆立表塔記之樹垣北門外即
 摩訶菩提寺庭宇六院觀閣三重周垣高五
 丈許佛像鑄金銀莊嚴工巧極世華美塔又
 高廣有佛舍利大如指節光潤鮮白通徹內
 外肉舍利者大如青珠形帶紅色每年至佛
 大神變月出以示人即印度十二月三十日
 於唐正月十五日也
 於此時也放光雨華大起深信其寺常僧滅

一千人習大乘上座部法儀清肅是南海僧
伽羅國王請中印度大吉祥王立之經今四
百年矣故寺多師子國人又菩提樹面十餘
里聖跡相隣差難備舉每年比丘解安居訖
四方諸俗白千萬眾七日七夜香華妓樂遮
林供養禮拜奉慶印度諸僧以唐五月十六
日入雨安居以唐八月十五日解夏斯亦隨
終一變不可約之如雪山北有國坐春坐秋
者意以一年之內多濕熱處制三月住就中
前後一月延促不定若據修道何時不安故

三時遊行通制有罪必有緣務亦開兼濟不
執也菩提樹院東度在連河大林中塔北池
者佛昔為香象子侍盲象母處前建石柱昔
迦葉波佛於此宴坐側有四佛行坐跡林中
小石柱是鬱頭藍發惡願處又東度莫訶河
東林野行百餘里至屈屈吒播陀山此言亦
世二謂窶盧播陀山此言
雞足直上三峯狀如雞足峭
絕孤起迥然空表半下茂林半上蔓草尊者
大迦葉波於中寂定故因名焉初佛以姨母
織成金縷袈裟傳付慈氏佛令度遺法四部

弟第迦葉承旨佛涅槃後第二十年捧衣入
 山以待慈氏上有一塔靜夜望之明炬自照
 雞足山東北百餘里至佛陀伐那山北崖大
 石室佛止數年旁有磐石帝釋摩檀塗佛今
 猶芳烈從空谷東出三十餘里申瑟知林言杖
 也竹滿山谷昔有人以丈六竹杖量佛而恒
 出杖表因投杖而去遂生根而被山焉中有
 一塔佛曾七日說法處林中有勝軍居士以
 香末為泥作五六寸塔上書經文名法舍利
 也三十年間晝夜無怠凡作七億每一億小

塔作一大塔盛之請僧法會稱慶其事皆放
 光明杖林西南十餘里大山陽二溫泉甚熱
 佛化浴焉遠近沐者沉痾皆愈側有佛經行
 像塔林東南七里許大山嶺上石塔佛於此
 兩三月為天人說法頻毘婆羅王疊石為道
 廣二十餘步長四里許壁四大山東北四里許至
 孤山仙人室也又東北五里小孤山壁石室
 可坐千人佛於此三月說法室上磐石梵釋
 於此磨檀塗佛今猶郁烈室西南隅巖岫即
 阿素洛宮石室側頻毘王徃佛所棧道斷石

通路長五里許作階也又東行六十餘里至
 矩奢揭羅補羅城北云茅宮城即摩揭陀
 之正中也多出香茅國中最勝古來諸王都
 其山城門闕存焉因香為名崇山四周以為
 外郭西通狹徑北開山門東西長周迴一百
 五十里樹華舍茂皆作金色內城周三十餘
 里城內荒涼都絕人物北門外塔佛舒手現
 五師子伏提婆醉象處又東北塔是舍利子
 闍馬勝比丘說法證道處塔北大深坑旁塔
 是室利鞞多言勝設火坑以害佛處坑東北

山城之曲有塔是縛迦醫王宅為佛建說法
 堂周垣華果藥株尚存佛多止中宮城東北
 十五里許至姑栗阿羅矩吒山即鷲峯亦鷲
 嶺接北山陽孤起頂上東西長臨崖西陞甃
 室廣高奇製其戶東開佛在世五十年多居
 斯室說法今作等佛身像昔影堅王為聽法
 故自山至峯跨谷陵巖編石為道階凡六里
 廣十餘步從杖林石室至此三階跡猶存焉
 階側二小塔一令王下一簡凡人其上精舍
 東長石佛曾經行履之傍有大石高丈四五

廣三十餘步是提婆所擲佛者處其南崖下塔佛此說法華經處

精舍南山崖大石室佛於此入定阿難別室魔怖之佛以手通石摩頂見有通穴精舍東北大石澗大磐石佛曬衣處文今明徹旁有

佛跡輪文入石北山頂塔佛望摩揭城七日

說法處山城北門西有毘布羅山西南崖陰昔有五百溫泉今猶數十尚兼冷暖源發雪山無熱惱池潛流出此猶清且美味同本池並彫石象師子之首石以同流下乃編石爲

池浴者病瘥諸有僧寺多取飲之以水沐髮終身常淨使人王玄策曾以沐首經今五載髮常潤淨不可思議泉左右塔及精舍故基羅列並四佛行坐跡此中山林相叢隱者見處泉西卑鉢羅石室佛昔恒居後壁洞穴是阿素洛宮此毘布羅山上塔是佛說法處今露形外道居之山城北門左南崖陰東行三里許大石室調達入定處室東有班血磐石上昔有比丘修定不證自刺頸便證羅漢升空化火自焚處崖上石塔習定者投崖證果

處北門外一里餘至迦蘭竹園精舍石基甄
室東開佛多止中室尚存矣今有等佛身像
竹園東大塔是阿闍多設咄路云未生怨即闍王
也得舍利分所建後無憂王開之別建諸塔
餘在者時放光焉側有佛經行處東有阿難
半身塔竹園西南六里許南山陰大竹林中
大石室是大迦葉波與千羅漢於此集三藏
處僧中上座即號上座部焉室西北塔是阿
難受責證果處名證果塔也西行二十餘里
塔者是諸學無學大眾法集五藏處因謂大

壁四

廿五

衆部焉竹園北二百餘步迦蘭池佛多說法
今枯涸也池西北三里許塔育王立高六十
尺石柱五十餘尺上刻立塔事柱東北不遠
至曷羅闍姑利四城即新王舍城本寒林地
闍王移都所築當茅城
東北外郭已壞內城周二十餘里面有一門
無憂王更都香華城將此施婆羅門今住者
減千家宮城西南二小寺佛昔說法處諸國
客僧多來投止次西北塔殊底迦長者故里
即樹提伽也
此言星曆王城南門外道左塔者佛說法
度羅怛羅處又北三十餘里至那爛陀寺施言

無本南菴設羅園也昔有五百商人買以施佛於中三月說法前後五王之所合造一鏤迦羅阿迭多王此言帝日創造此寺二佛陀毘多王此云覺護次南造寺三但陀揭多王此言如來次東造寺四婆羅阿迭多王此言幻日次東造寺五伐闍羅王此言金剛次北造寺周垣峻峙高五丈許總有七院院別二層同為一門歷代興建窮壯極麗寺立嚴制立寺已來女人不至知事十人每夕巡檢未具受者齒序為次僧徒數千遊學名僧通數

將萬多是俊才通學聲馳異域者其人數百故印度諸僧皆仰則焉其有不談藏旨者形骸自愧故殊方來詣守門者詰問多屈而返或客遊後進詳論藝能其退飛者固十有七八矣所以高才博達強識多能明德利人聯壁四暉接物至如護法護月振續芳塵德惠德堅廿六流譽物表光友清論勝友高談智月風鑒戒賢志業皆純粹於當時並昭彰於遠古既學冠舊儀述作論釋各數十部盛世流布故寺聖跡畧而可叙寺西精舍佛曾三月說法次

南百步小塔遠方僧見佛處又南有觀自在菩薩立像或見執香爐繞精舍右旋者次南一塔佛曾三月住剃剪處疾繞多愈西垣外池側塔是外道執雀問佛處東南垣內五十餘步有奇樹高八九尺其幹兩披佛昔嚼棄而生如故次東大精舍高二十餘丈佛曾四月說法處次北百餘步精舍觀自在像見感不同或立門側或出簷前故國法俗咸別供養次北大精舍高二十餘丈戒日王造莊嚴度量及中佛像同菩提樹下精舍也次東北

塔佛曾七日說法處西北即四佛坐處次南鍤石精舍高八十尺戒日王造今猶未了又東二百餘步垣外有銅立像高八十餘尺六層閣盛滿胄王所造此北三里韃精舍中多羅菩薩像量高靈異歲之元日盛興供養諸國王臣寶樂俱奏七日乃止寺垣門內大井佛為商侶熱渴指地曰此可得水因以車軸築之泉涌飲之悟聖也寺西南九里許沒特伽羅故里育王造塔記目連也又東四里許是頻毘王此云影堅迎佛處又東南二十餘

釋四

廿七

里舍利子故里育王建塔旁有尊者遺身塔及井存矣又東南五里塔迦葉波佛時有三億大羅漢同此入滅處又東三十餘里帝釋窟也巖谷危險華林竦茂兩峯特起西巖南面石室佛曾止住釋以四十二疑畫石請問其跡向存今像擬昔入禮肅然嶺上四佛行坐跡東峯有寺僧夜西望見石室前有燈炬照帝釋峯寺前有鴈塔其緣如經帝山東北百六十里許至迦布德寺云鵠僧有二百人寺東有塔佛爲大衆一宿說法徃昔佛作鵠

夜火與羅者食處東有育王塔塔南三里孤山甚高峻多塔廟上觀自在像軀小威大手執蓮華頂戴佛像斷食七日乃至一月便見真儀從像中出即僧伽羅王所造精舍也又東南行四十里寺僧五十人小乘學大塔多靈佛爲梵王等七日說法處側有四佛行坐跡寺東北七十餘里旃伽河南天祠東大塔佛曾一宿說法處又東入山林百餘里大寺育王塔佛曾三月說法處北三里大池周三十餘里四色蓮華四時開發又東入山林二

百里至伊爛拏鉢伐多國中印度周三千餘里
都城北臨菟伽河周二十里寺十所僧四千
餘人多小乘正量部天祠二十餘異道雜住
城中二寺各減千僧並小乘學城北河側伊
爛拏山古來五通仙常居今有天祠佛於此
三月說法城南塔佛曾三月說法旁有三佛
行坐跡國西界菟伽河南岸孤山長一里餘
佛曾三月安居降薄句羅鬼藥又處山東南
崖下大石上佛坐跡入石寸餘長五尺二寸
廣二尺一寸上有塔蓋次南石上佛拈稚迦

即祿
維也底深寸餘八出華又坐跡東南藥叉跡
長尺六寸廣八寸深二寸山頂有藥叉故室
北有立佛跡長尺八闊六寸餘深半寸上塔
覆西有溫泉六七極熱國南大林多野象極
大從此順菟伽河南岸東行三百里至瞻波
國中印度也周四千餘里都城北臨菟伽河周四
十餘里寺數十僧二百餘人小乘學也天祠
二十餘所異道雜居城以甄壘高數丈却敵
崇峻劫初人物伊始野居穴處後有天女降
人中遊菟伽河濯流自媚感靈有娠生四子

分贍部洲分疆建邑此則一子之都城即贍部之始主也地温熱宜象耳城東南百五十里菴伽河南水環孤洲中山崖上天祠多靈其國界野象羣遊又東四百餘里至羯朱喞祇羅國中印度周二千餘里寺七所僧三百餘人天祠十所異學雜居地多卑濕城北菴伽河岸有大高臺以甃為之四面鏤佛天等像南境多野象耳戒日王遊巡東天於此築行宮又東度菴伽河六百餘里至奔那伐彈那國中印度周四千餘里都城周四十餘里人盛

滿寺二十餘僧三千餘人大小兼學天祠百所異道雜居露形偏多城西二十餘大寺僧七百餘人並大乘學東印度境名僧出此有育王塔佛曾三月於此說法齋日放光側有四佛行坐跡次精舍中作觀自在像神降非一人多絕粒祈者必感土地卑濕出般耶婆果既多且貴大如鶴卵或在樹枝及根中如茯苓也又東九百餘里度大河至伽摩縷波國東印度也周萬餘里都城周三十餘里至今未有佛法自事天行天祠數百異道數萬人有

拘摩羅王言童子也據之相承千餘世矣土泉温
燠人物昌盛其國東境接唐西南有諸蠻獠
於彼朝貢云可兩月行便入蜀之西界其國
東南又饒野象其王聞沙門玄奘名畧遠來
中天迎請東達既見傾仰奄若舊交生信釋
門先開佛教奘又論議伏諸外道授以歸戒
更廣揚化是則東天佛教由奘弘之聲唱遐
塞戒日王知又延西返重加禮敬事在別傳
從此南行千三百里至三摩呬吒國東印周度
三千餘里近海卑濕都城周二十餘里寺三

十餘所僧二千餘人上座部也天祠百餘異
道露形甚盛城側育王塔佛曾七日說法處
旁有四佛行坐跡側寺中青玉像高八尺相
具威嚴自此東北大海濱山谷中有室利差
呬羅國次東海隅有迦摩浪迦國次東有墮
羅鉢底國壁四次東有賞那補羅國三上次東有摩訶
瞻波國即林邑也次西南有閻摩那洲國凡
此六國道阻不行又從三摩呬吒國西行九
百里至耽摩栗底國東印周度千五百里都城
周十餘里濱海卑濕寺十所僧千餘人天祠

五十異道雜居育王立塔四佛行坐跡又西
北行七百餘里至羯羅拏蘇伐剌那國

釋迦方誌卷中

音釋

鬻	鬻	鬻	鬻	鬻	鬻	鬻	鬻	鬻	鬻
無列切	餘地切	所交切	髮末也切	可交切	高燥也切	其拒切	疥廝切	疥廝切	疥廝切
鬻	鬻	鬻	鬻	鬻	鬻	鬻	鬻	鬻	鬻
鬻	鬻	鬻	鬻	鬻	鬻	鬻	鬻	鬻	鬻
鬻	鬻	鬻	鬻	鬻	鬻	鬻	鬻	鬻	鬻
鬻	鬻	鬻	鬻	鬻	鬻	鬻	鬻	鬻	鬻
鬻	鬻	鬻	鬻	鬻	鬻	鬻	鬻	鬻	鬻
鬻	鬻	鬻	鬻	鬻	鬻	鬻	鬻	鬻	鬻
鬻	鬻	鬻	鬻	鬻	鬻	鬻	鬻	鬻	鬻
鬻	鬻	鬻	鬻	鬻	鬻	鬻	鬻	鬻	鬻

釋迦方誌卷下

壁五

唐終南太一山釋道宣撰

遺跡篇第四之下

羯羅拏蘇伐刺那國

東印度金耳國也

周四千五百

里都城周二十餘里人物殷盛邪正兼半寺

壁五

十餘所僧二千餘人小乘正量部天祠五十

餘異道甚多別有三寺不食乳酪調達部也

城外寺塔育王所造佛嘗七日於此說法側

有精舍四佛行坐跡西南七百餘里至烏荼

國東印也周七千餘里都城周二十餘里信佛

法寺百餘所僧萬餘人並大乘學天祠五十

異道雜居塔有十餘並佛曾說法處西南境

大山中大寺石塔多瑞齋日放光承露盤下

覆鉢勢上以華蓋笱置之便住如磁石吸針

也自此西北山寺塔異者同前二塔神鬼所

造東境臨大海折利坦囉城

言教行者

周二十餘

里入海商人止路次也城外五寺臺閣崇高

尊儀巧異南去海中僧伽羅國二萬餘里靜

夜望彼佛牙精舍數百尺表上鉢曇摩羅伽

寶

寶大如升即琥珀也

珠光挺照懸燭此城又西南大

林千二百餘里至恭御陀國東印周千餘里

城都周二十餘里濱海土熱濕多有奇寶螺

貝真珠大青象等其俗信外道天祠百所異

道萬餘人境內小城數十據山海住又西南

大荒林行千五百里許至羯陵伽國南印周

五千餘里都城周二十餘里少信佛法寺十

餘所僧徒五百餘人大乘上座部天祠百餘

異道甚多城南育王塔高百餘尺四佛坐處

境北垂大山嶺上塔高百餘尺劫初人壽無

量時獨覺入滅處國中深林數百里出香象

隣國所重昔五通仙巖栖人觸通退便以惡

呪殺此國人今猶少也又此西北山林中行

一千八百餘里至憍薩羅國中印周六千餘

里山嶺周境林藪連接城周四十餘里邑里

相望大信佛法寺百餘所僧減萬數並學大

乘天祠七十異道雜居城南故寺塔佛曾現

通伏外道處後龍猛菩薩止此寺中又西南

三百餘里有跋邏末羅耆釐山云黑岌然特

上峯峭升絕既無崖谷宛如金石其國昔有

引正王為菩薩鑿山造寺去山數十里鑿開

孔道當山下仰穿踈石長廊步檐崇臺重閣閣有五層層有四院並有精舍妙窮工巧從山頂上飛泉流注重疊交通踈窻引明其內通朗人力既竭府藏又盡其功未半王甚憂之龍猛密以神藥滴諸大石並變為金玉見喜勇遂營得就於五層中各鑄四大金像量等佛身餘尚積庫因僧有諍工人用費並散傾久今唯淨人守護其數極多彌密其穴不可輒見又結法藏後一切諸經並此山中不許持出近有引醫方者入中療病後蒙面而

出故罕有達者從南林行九百餘里至案達羅國南印度周三千餘里都城二十餘里寺二十所僧三千餘人天祠三千餘外道極多城側大寺重閣竒巧佛像亦異前有石塔高數百尺並阿折羅言所行也阿羅漢所造近寺西南二十餘里孤山嶺上石塔即陳那菩薩造因明論處又西南一塔佛曾於此說法從此林野南行千餘里至馱那羯磔迦國南印度周六千餘里都城周四十餘里寺多毀壞存者二十餘所僧千餘人大衆部也天祠百餘異道

甚多城東西據山間各有大寺昔王為佛造
 真山踈石制極華博賢聖遊息佛滅未久有
 千凡僧安居罷日皆證無學陵虛飛去今寂
 無人有婆毘吠伽論師此云明辨即波若燈論主
 也於觀自在前絕粒而飲水三年待見慈氏
 觀自在乃為現色身今在此城南大山巖執
 金剛神所誦金剛呪三年神授方云此巖石
 內有阿素洛宮如法行請石壁當開可即入
 中待慈氏出我當相報又經三年然呪芥子
 擊於石壁豁即洞開時百千眾觀覩驚歎論

師跨門再三顧命唯有六人從入餘者謂毒
 蛇窟也當即石門還合如壁自此西南千餘
 里至珠利耶國南印度周二千五百里都城周
 十餘里人物少僧寺粗有天祠數十多露形
 外道城東育王塔佛於此度人伏外道處城
 西故寺提婆菩薩詰問温咄羅羅漢此云上也七
 轉已羅漢杜口不答私運通力往慈氏所告
 曰提婆者賢劫之佛非爾能酬如彈指頃還
 復談對菩薩知之謂曰此慈氏大聖之所釋
 也南林野行千六百里至達羅毘荼國南印度

周六千餘里都城周三十餘里寺百餘僧萬餘人皆上坐部天祠八十餘多露形外道有育王塔佛數遊此說法度人城南大寺塔高百餘尺佛曾說法伏外道處又有四佛行坐跡自此南行三千餘里至秣羅矩吒國南印度周五千餘里都城周四十里許僧少天祠數百外道甚多露形者其土濕溷不滋茂也城東有育王弟寺又育王立塔佛曾說法祈願皆遂國南近海有秣刺耶山有白檀香樹又羯布羅香樹松身異葉香如冰雪即龍腦香

壁五

印

南印度

也山東有布怛洛迦山頂有池流下出大河繞山二十市而入南海側池天宮即觀自在遊舍處也祈者見為自在天像山東北海畔城古僧伽羅國今入海三千餘里至僧伽羅國非印度攝即執師子也周七千餘里都城周四十餘里人戶大盛寺有數百所僧二萬餘人上座部也宮側有佛牙精舍高廣如前宮中日建萬八千僧食十數年來國亂方廢佛牙側小精舍中金銅坐像肉髻上安奇寶昔人因禮見寶起貪夜盜不及像首乃曰佛昔輕命為

生今何恠寶乃爾像乃俯首與之後王知而不罪王贖其寶還安像頂至今低首國東南隅數千里那羅稽羅洲人長三尺鳥喙唯食椰子國洲東南隅有駿迦山鬼神所遊佛於此說此經洲西浮海數千里孤島東崖石佛

望五

五

高百餘尺東面坐以月愛珠為肉髻月將迴照水即懸注人食之矣洲西浮海又數千里有大寶洲無人居止往無達者又於達羅昆國北林行二千餘里至恭達那補羅國南印度周五千餘里都城周三十餘里寺百餘所僧

萬餘人兼學大小天祠數百異道雜居宮城側大寺精舍高十餘丈僧三百餘人中有一切義成太子寶冠減二尺許齋日放光即菩薩時也大城側大寺中精舍高五丈餘二百億羅漢是一人名造檀慈氏像高一丈餘齋日放

光城北近多羅林周三十餘里葉廣長色光潤諸國同採以供書也林中塔四佛行坐迹二百億舍利塔亦此林中城東塔高三丈有舍利齋日放光佛曾遊此說法又西北林中猛獸所居二千五百里許至摩訶刺侘國南印度

度周六千餘里都城臨大河周三十餘里其俗有恩必報有怨必復強梁跋扈不臣戒日王也寺有百餘所僧徒五千餘人大小兼學天祠百數異道衆矣大城內外五塔四佛行坐迹育王表之城南故寺有觀自在石像願求多果東境大山寺羅漢造也大精舍高百餘尺石像高七十餘尺上有石蓋七重虛懸空中相去各三尺傳云羅漢願力所持或威神力或藥術力諸說不一精舍四面彫作佛因地及證果入寂相具矣寺門外南北各一

石像傳云象吼地則震矣

自此西行千餘里度耐末陀河至跋祿羯帖

婆國南印周二千五百里都城周二十餘里

邪正兼信寺十餘僧三百餘人智大乘上座

部天祠十所異道雜居土地鹵惡草木希薄

從此西北二千餘里至摩臘婆國南印周六

千餘里都城周三十餘里據莫訶河東南即

五印度之重學土也人性善順諸國所無同

摩揭陀南洲敬教其二國而已邪正兩信寺

數百所僧二萬餘小乘正量部天祠數百異

道塗灰其侶衆矣城西北二十里有大婆羅門邑側大陷坑水流無滿昔大慢婆羅門謗大乘生陷入地獄處自此西南入海道矣又西北行二千五百餘里至阿吒釐國南印度周六千餘里都城周二十餘里人盛滿家事天神祠十餘所異道雜居土地沙鹵出胡椒樹如蜀椒樹又出熏陸香樹葉如棠也又從摩臘國西北三日行彼百里為一日行至契吒國南印度周三十餘里都城周二十餘里人滿住寺十餘僧千餘人大小通學天祠數十外道特多

又北千餘里至伐臘毘國南印度即北羅羅之別也周六千餘里都城周三十餘里人住盛多財百億者有數百家寺百餘所僧六千餘人多小乘正量部天祠數百外道亦多佛數遊此國育玉多樹塔有三佛行坐迹又此西北行七百餘里至阿難陀壁王補羅國西印度周二千餘里都城周二十餘里人戶滿寺十餘所僧減千小乘正量部天祠數十外道雜居從伐臘西五百餘里至蘇刺吒國西印度周四千餘里都城周三十餘里西據莫醯河人住滿屬伐臘兼信

邪正寺五十餘所僧三千餘人上座部也天
祠百餘外道雜住地鹵斤華果少國當西海
路口不遠城西山頂有寺大宏敞華美仙賢
遊止又伐臘北千八百餘里至瞿折羅國西印
度周五千餘里都城周三十餘里人咸少信
佛寺一所僧百人小乘學天祠數十異道多
矣又東南二千八百餘里至鄔閣衍那國南印
度周六千餘里都城周三十餘里人盛滿寺
在者五所僧三百人大小兼學天祠數十異
道雜居地鹹果少城側塔者無憂造生地獄

處又東千餘里至擲枳陀國南印周四千餘
里都城十五里許寺數十僧少耳天祠十所
外道千餘人又北九百餘里至摩醯濕伐羅
補羅國中印周三千里都城周二十餘里不
信佛法天祠數十塗灰外道也從瞿折羅北
野磧行二千里許渡信度河至信度國西印
周七千餘里都城三十餘里土出金銀鍮石
一峯駝駝極卑小出赤白黑藍信佛法寺數
百所僧萬餘人並小乘正量部而多怠行天
祠三十異道雜居佛屢遊此育王建塔數十

焉有烏河側千餘里陂澤間數百千戶牧牛
 為業唯殺是務無貴賤男女道俗之別而剃
 頭髮服袈裟形同比丘樂行鄙俗又懷小兒
 誹斥大乘昔有羅漢乘空往化授三歸已剃
 染行法後還復本風俗故爾自東九百餘里
 越信度東岸至茂羅三部盧國西印周四千
 里都城周三十餘里人盛屬磔迦國寺十餘
 所僧極少特信天神其祠八所外道甚多城
 側有日天祠莊嚴甚麗鑄金為天形飾以奇
 珍文樂迭奏四周華池林木茂美五竺諸王

於此立福舍捨物給貧病者又正東七百餘
 里至鉢伐多國北印屬磔迦也周五千餘里
 都城周二十餘里人咸雜信寺十餘僧千餘
 人小大乘學有育王塔天祠二十城側大寺
 僧百餘人並大乘學近天火燒之土多旱稻
 從信度西南千六百里至阿點婆翅羅國西印
 度周五千里都城周三十餘里僻在西境地
 卑下臨信度河濱大海重佛法寺八十餘所
 僧五千餘人多小乘正量部天祠十所塗灰
 外道也佛曾遊此育王立六塔又城西減二

千里至狼揭羅國西印度廣縱各數千里都城

周三十餘里人盛滿近西海入西女國路口

屬波斯寺有百餘所僧六千餘人大小兼學

天祠數百塗灰外道盛土潤洽滋茂百卉自

此西北即至波刺斯國非印度攝周數萬里都城

聖五

九

周四十餘里人物甚盛寺有三所僧數百人

天祠甚多土出金銀鑰石頗胍水精死多棄

尸

佛鉢在王宮中東境有鶴秣城郭周六十餘

里人衆盛西北接拂林國非印度出伯狗子本

赤頭鴨生於穴中案梁貢職圖云去波斯北

一萬里西南海島有西女國非印度拂林年別

送男夫配馬彼圖又云波羅斯西一萬里極

婆羅門國南一萬里又是婆羅門以今往度

疑太遠遠從阿點北七百餘里至辟支勢羅

國西印度周三千餘里都城周二十餘里人盛

屬信度國寺五十餘所僧三千餘人小乘正

量部天祠二十餘塗灰外道也城北十六里

大林四佛行坐處育王建塔高數百尺中有

舍利放光佛曾作忍仙被此王宮處東有故

寺又東北三百餘里至峯茶國西印度周二千
 五百里都城周二十餘國無君長屬信度寺
 二十所僧二千餘人小乘正量部天祠五所
 塗灰外道也地多華果城東大竹林古寺是
 佛開諸比丘著互縛履此言靴處也旁塔高百
 餘尺側有精舍青石立佛齋日放光此南八
 百步林中浮圖育王所立佛止於此以寒故
 三衣重覆又開複納衣林中有佛經行處又
 四佛坐處別塔表之又髮爪塔齋日放光又
 東北九百餘里至伐刺拏國西印度周四千餘

里都城周二十餘里人住滿屬迦畢試寺數
 十所僧三百人大小兼學天祠五所塗灰外
 道也地多山林城南故寺佛曾遊此側塔是
 四佛行坐跡俗云此國西接稽曁那國居大
 山中復此西北又踰大山二千餘里山西印
 度境入胡俗境漕矩吒國又東北千六百里
 入迦畢試界方合北道及中道也畧舉突厥
 已南三海所內大合一百五十國非印度所
 攝者七十一國突厥以北至于北海而遊履無間故無可紀也

遊履篇第五

自文字之興庖羲為始暨至唐運歷代可紀而聞矣秦周已前人尚純素情不逮遠故使通娉止約神州漢魏已後文字廣行能事鬱與博見彌遠故象胥戴虎藁衛斯立踰空桑而歷昆丘度雞田而跨鳥穴龍文汗血之驥雖絕域而可追明珠翠羽之珍乃天崖而必舉窮兵黷武誠大宛之勞師擁節泥海信王命之遐弊及顯宗之感瑞也創開仁化之源奉信懷道自斯漸盛或既生邊壤投命西天或通法揚化振崇東宇或躬開教跡不遠尋

經或靈相舊規親往詳閱斯之多舉並歸釋宗故總別之用開神畧始於前漢至我大唐前後通數使之往返將二十許且張騫尋河本唯凡俗然創聞佛名則釋化之漸也故亦通叙求法之例今搜括傳記條序使途列其前後顯然有據

聖五

十一

怪理絕人區感驗明顯事出天外而騫超無聞者豈其道閉往運數開叔葉乎

二謂後漢顯宗孝明皇帝永平三年夜夢金人身長丈餘項佩日月光飛行殿前帝問羣臣道人傅毅曰臣聞西域有神其名曰佛陛下所夢將必是乎帝乃遣郎中蔡愔博士秦景等從雪山南頭懸度道入到天竺圖其形像尋訪佛法將沙門迦葉摩騰竺法蘭等還尋舊路而屆雒陽

三謂後漢獻帝建元十年秦州刺史遣成光

子從鳥鼠山度鐵橋而入窮於達觀旋歸之日還踐前途自出別傳

四謂晉武世燉煌沙門竺法護西遊三十六國大齋佛經沿路譯出至長安青門外立寺結衆千餘教相廣流東夏者法護深有殊功故釋道安云若親得此公筆自綱領必正斯至言也

五謂東晉隆安初涼州沙門釋寶雲與釋法顯釋智嚴等前後相從俱入天竺而雲通歷大夏諸國解諸音義後還長安及以江表詳

譯諸經即當今盛行莫非雲出而樂栖幽靜
終於六合山遊西有傳

六謂東晉後秦姚興弘始年京兆沙門釋智
猛與同志十五人西自涼州鄯善諸國至罽
賓見五百羅漢問顯方俗經二十年至甲子

壁五

十二

歲與伴一人還東達涼入蜀宋元嘉末卒成
都遊西有傳大有明據題云沙門智猛遊行
外國傳曾於蜀部見之

七謂後燕建興末沙門曇猛者從大秦路入
達王舍城及返之日從陀歷道而還東夏

永樂北藏

釋迦方志

八謂後秦弘始二年沙門法顯與同學慧景
等發自長安歷于填道凡經三十餘國獨身
達南海師子國乃汎海將經像還至青州牢
山登晉地往楊荆等州出經所行出傳

九謂宋初涼州沙門智嚴遊西域至罽賓受
禪法還長安南至楊州宋都廣譯諸經然以
受戒有疑重往天竺羅漢不決為上天謔彌
勒告之得戒於是返至罽賓而卒遣弟子智
羽等報徵西返

十謂宋永初六年黃龍沙門釋法勇操志雄

第一三三册

遠思慕聖跡招集同志沙門僧猛曇朗等二
 十五人發跡雍部西入雪山乘索橋并傳杖
 度石壁及至平地已喪十二人餘伴相携進
 達罽賓南歷天竺後沉海東還廣州所行有
 傳

壁五

十三

十一謂宋元嘉中涼州沙門道泰西遊諸國
 獲大毘婆沙還於涼都沮渠氏集衆譯出
 十二謂宋元嘉中冀州沙門惠散遊蜀之西
 界至南天竺曉方俗音義還廬山又入關又
 返江南

十三謂後魏太武末年沙門道藥從疎勒道
 入經懸度到僧伽施國及返還尋故道著傳
 一卷

十四謂宋世高昌沙門道普經遊大夏四塔
 道樹靈跡通謁別有大傳又高昌法盛者亦

經往佛國著傳四卷

十五謂後魏神龜元年燉煌人宋雲及沙門
 道生等從赤嶺山傍鐵橋至乾陀衛國雀離
 浮圖所及返尋於本路

十六謂大唐京師大莊嚴寺沙門玄奘以貞

觀三年自弔形影西尋教跡從初京邑西達沙州獨陟險塞伊吾高昌備經危險時高昌王麴氏為給貨賂傳送突厥葉護牙所又彼將送雪山以北諸蕃胡國具觀佛化又東南出大雪山達諸印度經由十年後返從葱嶺南雪山北歷諸山國東歸經于闐婁蘭等凡一百五十國貞觀十九年安達京師奉詔譯經乃著西域傳一十二卷余歷尋僧傳并博聽聞所遊佛國備之前矣然記傳所見時互出沒取其光顯者方為叙之至如法維法表

之徒標名無記者其計難緝又隋代往還唐運來往咸績履歷具程油素諸如此例何可具焉

通局篇第六

法王利見未闕中邊適化無方豈專形教致

壁五

十四

使聞同解異說一悟殊登位地而上征結封迷而下降全身碎身之相聚塔散塔之儀神光燭而邪計摧靈跡挺而深信結斯徒眾矣具列前篇自法水東流道光西照聲榮之盛騰實東川育王表塔創啓隆周釋父景形鬱

與炎漢自斯歷代世積彌繁景匪西天獨揚
神化故經云正法後被先於北方次及東南
至中方滅此之震旦南望華胥滅度之儀迴
身北首即其事矣所以依錄編次以為通局
篇云

按周書異記周昭王即位二十四年甲寅歲
四月八日江河泉池忽然泛漲井水溢出山
川震動有五色光入貫太微遍於西方盡作
青紅色太史蘇由曰有大聖人生於西方一
千年外聲教及此昭王即勅鑄石記之埋於

南郊天祠前此即佛生之時也

周穆王即位三十二年數見西方光氣蘇由
先說聖人處世即與相國呂侯乘驂騮八駿
西行求佛因以禳之

周穆王五十三年壬申歲二月十五日平旦

暨五

十五

暴風忽起損舍折木地動天陰西方白虹十
二道太史扈多曰西方聖人滅矣此即涅槃
之相也有諺云佛生周莊魯莊之世者今取
多文為錄

史錄曰商大宰詔問孔子曰孰為聖人孔子

曰西方之人有聖者焉不治而不亂不言而自信不化而自行蕩蕩乎民無能名焉老子西昇經云吾師化遊天竺善入泥洹

前漢孝武帝元獸中霍去病討匈奴至臯蘭過居延山獲昆耶休屠王等又獲金人率長丈餘列之於甘泉宮帝以為大神燒香禮拜及開西域遣張騫使大夏還云有身毒國身毒國一名天竺始聞浮圖之教此即佛之形教相顯之漸也

哀帝元壽年使景憲徃大月氏國因誦浮圖

經還漢當時稍行浮圖齋戒

成帝時都水使者光祿大夫劉向傳云向博觀史籍徃徃見有佛經及著列仙傳云吾搜檢藏書太史創撰列仙圖黃帝以下迄至于今定檢實錄一百四十六人其七十四人已見佛經矣據此而明秦周已前早有佛法流行震旦何以取知今案所列

故佛傳云佛滅度後一百一十六年東天竺國有鐵輪王統閻浮提收佛靈骨役使鬼神一億人處為起一塔四海之內合起八萬四

千故此九州之地並有遺塔云是育王所造當此周厲王之時故塔興周世經二十餘王至秦始皇三十四年焚燒典籍育王諸塔由此淪亡佛經流世莫知所在又釋道安朱士行等經錄曰云始皇之時有外國沙門釋利

雙五

十六

防等一十八賢者齋持佛經來化始皇始皇弗從遂囚禁之夜有金剛丈六人來破獄出之始皇驚怖稽首謝焉唯此而言則知秦漢以前已有佛法尋道安所載十二賢者亦在七十之數今列仙傳見有七十二人案文殊

泥洹經佛滅度後四百五十年文殊至雪山中為五百仙人說法又案地理志西域傳云雪山者即葱嶺也其下三十六國先來奉漢其葱嶺連亘東至終南文殊來化仙人即斯地也詳而驗之劉向所論可為證矣

後漢郊祀志曰佛者漢言覺也將以覺悟羣生也統其教以修善慈心為主不殺生類專務清淨其精者為沙門漢言息心剃髮毀容去家出俗絕情洗欲而歸於無為也又以人死精神不滅隨復受形所行善惡後生皆有

報應所貴行善修道以練其精神練而不已
以至無生而得為佛也身長丈六尺黃金色
項中佩日月光變化無常無所不入故能化
通萬物而大濟羣生也有經書數千卷以虛
無為宗包羅精麤無所不統善為宏闊勝大
之言所求在於一體之內所明在於視聽之
表歸於玄微深遠難得而測故王公大人觀
生死報應之際莫不悚然自失也餘如漢法
本內傳
魏書云蔡愔得佛經四十二章及釋迦立像
明帝令畫工圖寫置於清涼臺及顯節陵上

陸五

十七

經文緘於蘭臺石室愔之還也以白馬負經
而至漢因立白馬寺於洛陽雍門西其經旨
大抵言生生之類皆因行業而起有過去當
今未來三世也其修道階次心行等級非一
皆緣淺以至深藉微以為著率在於積仁順
蠲嗜欲習虛靜而成通照也其始修心則依
佛法僧受三歸也三歸如君子之三畏又有
五戒斷殺盜婬妄語飲酒大意與仁義禮信
智同云奉持之則生人天勝處離鬼畜諸苦
言善惡之處凡有六道在於防心正身口總

謂十善也能具此者近獲天報遂得菩提
佛以四月八日夜從母右脅而生起相異者
三十有二既去世後弟子等以香木焚身靈
骨粉碎大小如粒其色紅白擊之不壞焚之
不焦每有光明神驗及後阿育王者以神力
分佛舍利使諸鬼神造八萬四千寶塔今洛
陽彭城扶風蜀郡姑臧臨淄等皆有塔焉並
神異矣吳書曰赤烏四年有康居國沙門康
僧會者行化道也初達吳地營立茅茨設像
行道吳人初見謂為妖異有司奏聞吳主孫

權問曰佛有何靈驗耶會曰佛晦靈跡出餘
千載遺骨舍利應現無方權曰若得舍利當
為起塔經三七日遂獲舍利五色曜天剖之
逾堅燒之不然光明出火作大蓮華照曜宮
殿吳主歎異信心乃發為造建初寺度人出
家權問尚書令都鄉侯闕澤曰漢明已來凡
有幾年佛教入漢既久何緣始至江東澤曰
從永平十年至今赤烏四年合一百七十年
然以永平十四年五嶽道士與摩騰較試之
時道士不如南嶽褚善信費叔才等在會自

壁五

十八

感而死門徒子弟歸葬南嶽不預出家無人
流布後遭漢政陵遲兵戈不息經今多載始
得興行吳主曰孔丘老子得與佛比對不澤
曰臣尋魯孔丘者英才誕秀聖德不羣世號
素王制作經典訓獎周道教化來葉師儒之
風澤潤今古亦有逸民如許成子原陽子莊
子老子等百家子書皆修身自翫放暢山谷
縱大其心學歸澹泊事乖人倫長幼之節亦
非安世化民之風至漢景帝以黃子老子義
體尤深改子為經始立道學勅令朝野悉諷

誦焉若將孔老二家遠方佛法遠則遠矣所
以然者孔老設教法天制用不敢違天諸佛
設教天法奉行不敢違佛以此言之實非比
對明矣吳主大悅以澤為太子太傅
魏書明帝曾欲壞宮西浮圖外國沙門乃金
盤盛水置於殿前以舍利投水仍有五色光
起帝加歎異乃於道東作周閭百間以為精
舍吳後主孫皓虐政廢棄淫祀佛寺相從亦
同廢限諸臣僉曰康會感瑞太皇創寺若遂
除毀恐貽後悔後宮內掘地得金像皓乃穢

之陰處尤痛聲叫難忍太卜曰犯大神所爲於是廣祈名山大川罔不畢至而痛苦彌甚有請祈佛者皓曰佛爲大神耶試可求之一請便愈乃以馬車迎會爲陳報應皓見本業百二十願皆爲衆生深加敬重仍於會所從受五戒准此掘地獲像明知秦周有佛教驗矣

西晉愍帝建興元年有二石像浮于吳松江源者疑爲海神延巫祝以迎之風濤更盛奉黃老者謂是天師復往迎接風浪如初奉佛

居士朱膺者吳縣人素有誠信共東靈寺帛尼并信者數人至滬瀆口迎之風潮忽靜遙見二人至乃石像立高七尺波中捧上置通玄寺銘其背一名惟衛二名迦葉莫測帝代而字迹分明

東晉孝武帝寧康三年二月八日沙門釋道安威德昭彰擅名宇內於襄陽郭西鑄丈六無量壽像明年季冬嚴飾成就像乃西行上於萬山于時鄉邑驚嗟迎歸本寺仍以其夕出住寺門刺史郗恢乃改名金像寺梁武帝普

通三年帝於建興苑鑄大金銅像華趺高六尺廣一丈許勅劉孝儀為文立碑讚德及周武之滅法也建德三年有太原公王康為荊州刺史副將長孫哲不信佛法先欲壞之遣百餘人以繩繫項挽全不動哲謂不用力杖之令牽如故不動又加三百乃至五百牽之乃倒聲震地動即令毀之揚聲自快乃馳馬欲報刺史裁可百步塌然落地失瘖直視尋爾而卒道俗唱快當毀像時於腋下倒垂衣內著銘云

壁五

二十

晉太元十九年歲次甲午比丘道安於襄陽西郭造丈八金像一軀此像更三周甲午百八十年當滅計勘年月悉符同焉信知印手聖人誠不虛矣然以事推安以太元三年戊寅之歲則符堅建元十五年也與朱序習郁被俘秦土太元十年在關便化化後十年歲方甲午一往橫望年紀參差預覩未然三經甲午取其大運之極數又顯印手之通聖云晉太元中沙門曇翼者於荊州造長沙寺寺成而未有佛像翼曰大聖遺跡遍閭浮提豈

我無感而不降耶乃潔齋祈仰以二月八日夜見于城北形儀嚴肅高于七尺光相衝天諸處迎接初不能起翼曰將非道感所致降我長沙乎乃與三人捧之颯然輕舉迎入寺中昔經夜行人謂怪異以刀擊之鎗然作聲

卷五

廿一

視乃金像刀所擊曾文現於外後罽賓僧云是育王像也光上有字時大重之梁武間之屢迎東下雖加事力終無以致後竭丹欸鄭重殷勤方乃下船去都十八里帝自出迎尋路放光相續不絕道俗稱慶後在太極殿重

興供養晚出大通門入同泰寺又加供養及寺火燒堂刹並盡唯像居殿巋然獨存晚還荊州本寺夜出遠塔降靈非一及元帝崩諸有凶事輒流汗在地近太宗晏駕亦如前流汗其瑞極多

晉咸和中丹陽尹高悝見張侯橋浦有異光使人尋之得一金像無有光趺載至長干巷口牛住不行乃任所之徑趣長干寺後數年臨海漁人張係世於海口見銅蓮華趺浮水上乃以表聞勅送像足宛然符合後有天竺

五僧詣惺云昔於本國得阿育王像至鄴遭亂藏于河岸近感夢云吾已出江南為高惺所得乃引至寺僧見流涕像為放光照于內外僧曰此像乃育王第四女所造文在華趺上因檢同焉又云本有圓光計應尋至後晉咸安元年交州合浦採珠人董宗之見海底光浮出水上尋得佛光以事奏聞簡文勅施像背孔穴懸同光色無改四十餘年江海隔絕一朝方具八百懷嗟自晉及陳五代君王莫不親敬每有亢旱請像乘輦入宮祈請無

不畢兩陳氏禎明中其像自然轉身面西雖正還爾具以奏聞帝延處太極設齋行道像乃脫七寶冠挂手帝燒香誓曰若國不祥願重現相仍以冠首至明還脫君臣失色及隋滅陳朝佐露首面縛入京文帝知之延至宮內常侍供養後下勅曰朕老不能久立可作坐育王像進內其本像於興善供養寺見形小置于北面及明乃見在南相從內愧今現在殿圖寫殷矣及仁壽立塔一百餘州皆有光瑞如感應傳元魏太武大延元年有沙門劉薩何者家于

離石南高平原今慈州也昔行至涼州西番
 禾郡東北望御谷而遙禮曰此山當有像現
 靈相備者世樂時平如其有闕世亂民苦後
 經八十七歲至魏正光元年因大風雷雨震
 山巖挺出像身一丈八尺形好端嚴唯無其
 首登即選石命工安訖還落魏道凌遲其言
 驗矣

至周元年始治涼州城南七里澗忽見佛首
 石采光明乃往安之恰然符合神儀彫缺四
 十餘年身首異處二百餘里一朝圓具眾咸

嗟歎時有燈光流照鐘聲飛響莫知來處建
 德初年像首頰落大冢宰及齊王躬往看之
 乃令安處夜落如故經于數十更換餘頭終
 墮如故後滅佛法僅得四年國喪滅嗣斯言
 又驗故模寫其狀畢量有差今為感通寺焉

壁五

廿三

何遂死于酒泉城西七里澗中骨如葵子人
 拾穿之如彼寺碑余以貞觀初年歷遊關表
 故謁何之本廟在慈州寺中形影端峙日有
 隆敬自石隰慈嵐延丹綏銀等州並圖形崇
 養號為劉師佛焉

元魏天平年中定州募士孫敬德造觀音像
自加禮敬後爲劫賊所引不勝拷楚安承其
死將加斬決夢一沙門令誦救生觀世音經
千徧得脫有司執縛向市且行且誦臨刑滿
千刀斫自折以爲三段皮肉不傷三換其刀
終折如故視像項上有刀三跡以狀奏聞承
相高歡表請免死勅寫其經廣布於世今謂
高王觀世音焉自晉宋梁陳魏燕秦趙國分
十六時經四百觀音地藏彌勒彌陀稱名念
誦獲其將救者不可勝紀其諸傳錄故不備

載梁高天鑒年於本第造光宅寺鑄金銅丈
八像將就冶鑄疑銅不足始欲上請便有薄
詔領銅十五車至云奉勅送寺即就融寫一
鑄便成惟覺高大試量乃二丈二尺以狀奏
聞勅云初不送銅斯爲通感遂鑄于華趺以
爲靈誌于今存焉

陳武帝崩兄子蒨嗣業造輜輶車乃取梁武
重雲殿中珠珎以飾送終人力旣豐四面齊
至但見雲氣擁結流繞佛殿自餘方左開朗
日耀須臾大雨洪注雷電震吼煙張殿表火

烈雲中流光布焰高下相屬並見重雲殿影
金銀二像八部神王并及帳座一時騰舉煙
火挾之欻然遠滅觀者傾國及晴之後覆看
故所唯礎存焉至月餘日有從東州來者云
於是日見殿影像乘空飛於海上有望海者
有時見之

壁五

廿四

魏氏洛京明帝胡后造永寧浮圖去地千尺
閻浮一洲無勝斯塔後為天震緣畧同前有
人東海亦見其相又魏氏北臺恒安石窟三
十里內連次而列高二十餘丈內受千人終

劫不朽震旦海曲神州諸山往往聖寺感見
非一旦述三兩用為實錄昔晉太元初有燉
煌沙門竺曇猷乞食坐禪強志勤業遊會稽
剡縣石城山羣虎來前猷為說法一虎獨睡
乃以如意打頭有十圍蛇繞之初無怖色又
山神捨宅與之又往赤城山宴坐此山與天
台瀑布四明連屬父老云天台山有聖寺猷
往尋之石橋跨谷青滑難度橫石斷路無由
得達夕宿橋首聞彼行道唱薩聲便潔齋自
勵忽見橫石洞開猷便前度具覩精舍神僧

燒香中食畢謂曰却後十年自當來此又有
齊鄴下大莊嚴寺沙門圓通者感一神僧夏
口聽講自恣訖辭云在竹林寺邀道過寺通
具問道徑明年尋至在鼓山東鄴之西北神
僧迎接具見門闕房宇華敞林竹切天經宿
周流意言道合便有終焉之思神僧為諮大
和尚乃不許之及還返路三里之外返望莫
覩後之往者不知其處
近鄧州沙門道勤者於州北倚立山追訪仙
寺如言具見周循歷覽實為佳寺眾具皆備

世五

廿五

但不見人却下重尋便失歸路乃於道次築
室擬尋又汾州東介山抱福巖者山居之僧
數見沙門乘空來往又益州東三學山常有
神燈空中照耀齋日倍多又涼州南洪崖窟
沮渠蒙遜所造碑寺現存有塑聖僧常自行
道人來便止人去尋行故其旁側足跡納納
爾斯徒眾矣不可具云余聞入大乘論尊者
實頭盧羅睺羅等十六大阿羅漢住世通法
又有九億無學亦此洲中未入涅槃准此而
詳今諸山居多聞磬聲或尋遇寺豈非諸聖

之所處乎今約通局諸門以分一約徃世二約賢劫三約釋迦一佛為候初約徃劫用辨通塞者如上所列徃劫行事薩埵捨身流血尚在達拏捨子杖捶遺血布髮掩泥之所捨身求偈之地月光斬首尸毘飼鷹斯等遺蹤並惟古劫計數災蕩如何尚存印度名僧亦決斯致理如所問無宜獨留而徃事徃生彌綸於五印者有人云此乃如來神力菩薩至行雖有三災不可除滅後成世界依而集之有人言三災之化無徃不除但欲使後代可

師仰故世界初成依古遺蹤相似而現並佛之化跡神感所為故五不思議中一為佛力也所以徃劫生事依依列之二約同劫以明且如一鉢千佛共同故傳云釋迦受食四王奉鉢滅後流行至毘舍離若千百年又至乾陀衛又至月支于闐龜茲當達震旦返師子國還來天竺上昇兜率天彌勒見曰釋迦佛鉢今來至此七日供養還下龍宮彌勒道成四王還獻二者龍宮佛影千佛同留三者方石說法千佛同坐即健陀卑鉢樹下者四者

壁五

廿六

石塔盛衰千佛同候上傳之中多明四佛行
坐之跡准此未來抑亦可見三明釋迦一代
通局不等如天道寶階滅無遺緒吒王大塔
七化已三道樹滅而更生佛跡毀而還現楊
技推而重出舍利試而逾靈諸如此例故應
不通後佛至如雞足迦葉留化慈尊小官明
辨持身待聖沮渠滅定之侶摩支應供之徒
事局未來神遊絕域皆為明道開顯塵蒙慈
導有情澄神諸有故也

時住篇第七

案索訶世界一大劫中千佛出世尋夫劫波
之號不可以時數推之假以方石芥城准為
一期之候中含四大中劫謂成住壞空也如
從十歲增至八萬復從八萬至於十歲經二
十反為一小劫二十小劫為一成劫以年筭
之則經八千萬萬億百千八百萬八萬歲也
止為一小劫耳今成劫已過入住劫來經七
小劫釋迦如來住劫第四尚餘九百九十六
佛次續興焉

依摩耶經如來滅後正法五百年像法一千

年又依善見毘婆沙云如來滅年正法千年
 像法亦爾以度女人故正法滅五百年若諸
 女人能遵八敬如法行道正法住世還得千
 年又云佛法住世一萬年初五千年修道出
 家得三達靈智後五千年出家修道不得三
 達靈智過此已後經歸龍宮像自頽壞諸比
 丘等同於俗流唯有剃髮袈裟而已佛法之
垂震旦

三波誅焚初劫連劫號為夏國初破長安
 遜僧皆殺二魏太武用崔皓言夷滅三寶後
 梅皓加五刑三周武帝但令還
 俗皆不得其死如傳所詳也

教相篇第八

自釋教之來震旦開濟極焉發悟踈通廓清
 塵滓其中瑞應具編前聞且述數條用程無
 惑昔士行尋教意在大衆將發西域乃有留
 難遂將經投火經身不灰火為之滅東達此
 土即放光經是也又曇無讖獲涅槃經至於
 涼土盜者夜竊舉而不起稽首謝焉周武之
 廢法也像毀經焚咸見藏經相從騰上奄入
 空際如斯眾矣不可具書然弘教在人有人
 為本度人立寺圖像譯經世約相求故叙由
 來昌明佛教而漢魏已往固無得而稱聞哥

宋迄今輒畧銓序

晉世祖武皇帝大弘佛事
廣樹伽藍

晉惠帝洛下造聖
寺供常百僧

晉敏帝於長安造通
靈白馬二寺

右西晉二京合寺一百八十所譯經一

壁五

廿八

十三人七十三部

僧尼三千七百人

晉中宗元帝江左造瓦官龍宮
二寺度丹陽千僧

晉肅宗明帝造明興道場二
寺集義學百僧

晉顯宗成帝造中興鹿野二
寺集義學千僧

晉太宗簡文帝造像度僧立寺
長干起木塔

晉烈宗武帝造皇泰寺本
第立本起寺

晉安帝於育王塔
立大石寺

右東晉一百四載立寺一千七百六十

八譯經二十七人二百六十三部

僧尼二萬四千人

宋高祖武帝口誦梵本手寫戒經造
靈根法王四寺供十僧

宋太宗明帝造丈六金像齋感舍利
造弘善中寺召諸名僧

宋太祖文帝奉齋不殺造禪
靈寺常供千僧

右宋世合寺一千九百一十三譯經二

百一十部

僧尼三萬六千人

齊太祖高帝

手寫法華口誦般若四月八日
常傳金像七月半日晉寺造金

此正觀二寺
供僧三百造陟

齊世祖武帝

造招玄遊賢二寺三百名
僧三教格量四年考定

齊高宗明帝

寫一切經造千金像口誦般若
常轉法華造歸依寺召集樞僧

常持
六齋

右齊世合寺二千一十五所譯經七十

一部

僧尼三萬二千五百人

梁高祖武帝

制五時論轉四方等造先宅同
泰五寺常供千僧國內晉持六

成齋八

梁太宗簡文帝

建資敬報恩二寺刺血自書
般若十部太后忌日不食而

齋撰法集記二百餘卷
法寶照壁亦二百餘卷

梁中宗元帝

造天居天官二寺供有
千僧自講法華成實

右梁世合寺二千八百四十六譯經二

百四十八部

僧尼八萬二千七百人

梁宣帝

梁明帝

右二主中興社稷於荊州造天皇陟祀
大明等諸寺治在江陵一州佛寺一百
八所

僧尼三千二百人

陳高祖武帝 揚州造東安興聖天居四寺寫
一切經一十二藏造金銅像一

百萬軀度僧七千人治
故寺三十二所

陳世祖文帝 寫五十藏經度僧尼二
萬人治故寺六十所

陳高宗宣帝 揚州禁中造太皇寺七級木塔
又造崇皇寺利高十五丈下安
佛爪造金像二萬餘軀治故寺
五十二所故像一百三十萬軀寫
度十二萬經

度十二萬經
一萬人

右陳世五主三十四年寺有一千二百
三十二國家新寺一千七百官造者六
十八郭內大寺三百餘僧尼三萬二千
人譯經十一部輿地圖云梁氏都下舊
有七百餘寺屬侯景作亂焚燒蕩盡有

壁五

三十

陳既統國及下民備皆修葺表塔相望
星羅揭輦經像之富不可殫言

魏元太祖道武帝 於虞地造十五級塔又
造開泰定國二寺寫一

切經造千金像三
百名僧每日法集

魏高宗文成帝 重復佛教更開釋門
凡度僧尼三萬許人

魏顯祖獻文帝

造招隱寺

魏高祖孝文帝

於鄴造安養寺召四月六日齋
宮侍女皆持年三月六日齋
基通者放令出家手不釋卷須
便為講為先皇再治大覺大行
一萬四千僧尼

魏世宗宣武帝

於式乾殿自講摩經造
晉通大定四寺常似千僧

魏肅宗孝明帝

於鄴下造

魏敬宗孝莊帝

造五精舍
一萬石像

西魏武帝

長安造陟屺
寺供二百僧

魏文帝

造般若寺用給貧老
口誦法華身持佛戒

右元魏君臨一十七帝一百七十年國

家大寺四十七所北臺恒安鑄石置龕

連三十里王公等寺八百三十九所百

姓所造寺者三萬餘所總度僧尼二百

餘萬譯經四十九部佛教東流此焉為

盛唯太武世信用司徒崔皓佞說凌廢

正教潛隱七年後知詐妄戮誅崔氏還

興佛教光闡於前

齊高祖文宣皇帝

登封受禪於僧刹禪師受
苦禁斷肉禁酒放鷹除

網又斷天下屠年三月六日勸
民齋戒公私善辛亦除滅之度
千人

齊肅宗孝昭帝 為先皇寫經一十二卷度三十僧
齊世祖武成帝 為先皇寫經一十二卷度三十僧

右高齊六君二十八載皇家立寺四十

三所譯經一十四部度人與魏相接

周孝明帝 為先皇造織成像高二丈六尺

周太祖文帝 於長安立追遠陟屺大乘等六寺度一千人又造五寺供養實

周高祖武帝 為文皇造錦像高一丈六尺實

塔永二十軀入京下造亭國會
昌寫經一千七百部後遇張賓
人所依方為不善之者
廢僧尼三百萬人

周孝宣帝 重隆佛日造塑像四龕一萬餘軀

寫般若經三千卷六齋八戒常弘
絕不

右周世宇文氏五帝二十五年合寺九

百三十一所譯經一十六部

隋高祖文皇帝 開皇三年周朝廢寺成為立

餘州立舍利塔度僧尼二十三
萬人立寺三千七百九十二所
寫經四十六藏一十三萬二千
八十六卷治故經三千八百五
十三部道像十萬六千五百
六十軀自餘列造不可具已
皇猷后於長安造二禪定并二
并立別寺十所六供四事治故
經六百一十二部治像一十萬一

